

摘藻堂四庫全書薈要

集部

欽定四庫全書薈要卷一萬六千三百六

集部

石田文集卷十一

元馬祖常撰

碑誌

勅賜贈翰林學士杜文獻公神道碑銘

相之安陽縣王裕里有處士杜縵山之墓既葬之六十  
六年當天歷己巳皇贈處士官翰林學士階資德大夫  
勛上護軍爵魏國公謚文獻越六年元統甲戌皇又詔  
臣祖常製其墓之碑臣具書其碑之字以賜其曾孫臣

秉彛使刺臣受詔按監察御史臣蘇天爵序公言之  
狀為文曰公諱瑛字文玉其先霸州人金將亡士少識  
時變猶以業文辭規進取而公獨自霸州之信安辟地  
河南緱氏山中於天下書靡不讀讀靡不記亦靡不見  
其旨趣上下今古於得失否臧之悉靡有不究其心皆  
無一作兼衆人之存而若有待於世金亡顛額暴殲畝仕  
者鹿兔走血氣不得寧而公獨間關轉徙以詩書從容  
授徒汾晉間故中書鈞祐祿珪開府于相以書幣聘公至

獨教以緩刑薄斂廣學內士興利補弊以脩扞其民而  
卒以基平宋之業會國朝歲己未世祖觀政江南至相  
召公問計公對以謂漢唐以還天下之趨舍安危顧法  
與食與兵三者而已國無法不紀人無食不命亂無兵  
不守三者君之恃也今宋蔑之殆將亡矣以宋之將亡  
而興之在聖主天命必得今若控襄樊之師委戈下游  
以擣其背而無縮於銳是縣車束馬而大業定矣更勸  
上數事以為事不爾後當如此上內之心賢公謂可屬



以大用既皆如所云江南平即使使至相徵公聞王文  
統當國輒引避使索不見近臣奏起公為大名彰德懷  
孟等路提舉學校官辭不就或諭使仕則曰後之世雖  
去古之世遠而先王之所以設施制度其本末先後未  
嘗有異也今不能因天下之哀苦以變更後世之弊政  
以趨合先王之意焚焉而已其勢豈易易

下易一作為

復古

哉吾又不能窺時僂仰以赴機繁之會仕奚從益於是  
杜門謝客著書窮學於世之貴富賤貧一無所動其心

以優游厭飫於道藝以終其身以歿嗚呼公之言若此  
其尤可以窺公之志也其所著有春秋地里原委十卷  
語孟旁通八卷皇極引用八卷皇極疑事四卷極學十  
卷律呂禮樂雜說三十卷其大畧不以一身之窮而亡  
天下之憂以為不見其志於行事則將文以發其意文  
不克用於時則將以垂諸後後之人用吾言焉吾固不  
窮也公所為作之意若此公之志可知矣始公之學也  
有所待而迄不得已施以止蓋亦遯世而不悔者歟其

志若此其仕不至于耽祿而弊時審矣惜公之去而不  
試于事也公氣貌魁偉美鬚儀望之儼然爵祿器也既  
家於相中書畀以相之良田千畝不受術者言公居屋  
下當有黃金家人欲發視公斥止之公去居者果得金  
百斤觀公之存於二事之廉若不足數然公之歿也既  
久其大者漸以無傳則其小者亦不得而畧也公以至  
元十年九月十六日終于家壽七十終之日命諸子曰  
既死當題我曰處士杜緱山墓今首之碑從公志也公

魯王父信王父植父時升母某氏配孫氏後公九年卒  
祔公墓子男三人處思甫冠卒處立郡文學處愿終東  
昌路推官有惠政女適李某孫男又三人曰愚以子秉  
彛貴封奉議大夫樞密院判官驍騎尉安陽縣子曰堅  
曰欽皆為士魯孫七人秉彛秉鈞秉直秉讓秉容秉一  
秉德魯孫女二人洹漳嗚呼公之事遠矣故雖詳公之  
言而所次止此然即此而公之為人可見則亦豈得為  
畧哉秉彛由丞相掾為奎章閣典籤時與脩大典嘗錄

公之事以送太史今拜陝西行臺御史而天子又賜公之碑以往焉相人見秉彛之來必曰是魏公厚積之貲

一作施

有曾孫賢其將大未艾則不寧公有榮也秉彛亦

賢後嗣哉我國家褒卹寵嘉之意蓋亦有徵矣故臣取其尤可以傳後世者序之而為銘銘曰

明明世后皇聞于天我征徂南捷捷其陳建我干旄于洹之濱遑脂我車軌蒲殷殷魏公在野誰適與謀學以待世靡恫靡罹維世后聖聘公于遺后曰公賢庶幾其

來南國之痛我恭天紀鳳鳴在雲魚泳于汜億億臣同  
盡瘁以仕矧是藝哲寧不我有公拜稽首匪臣有辭降  
極瘼矣民殫胥疲誰唁臣者而出位思大德受命昭假  
靡遲在昔帝者監觀萬國法與食兵燕民孔極宋嘻蔑  
矣孰其可追帝御六師以匡不獲同我髦士簡我戎行  
鈎援戟鍬以臨樊襄勿進而持勿惡于揚撓其餒俘涉  
自漢陽轟行騎翼咸與之位一作立后納公言試靡有忒  
大命甫集偃我干革束帛詣公謂公來即彼何人斯公

胡罔懌皎皎白駒在彼空谷考槃朝謳願言韞匱雖則  
韞匱懋勳有俶完歸壽考以綏後祿公在亂離人知書  
詩公發偉畫乃合天時有炳其云有鬱其間機緘闢露  
後公之文公生靡崇歿有多祉兆相之交從以孫子既  
六十年樹石墓址天子之賜魯孫之美魯孫之美追榮  
孔多有列郡獻公延爾那哀如之何矢詩不磨

翰林學士元文敏公神道碑銘

有元古文之宗曰翰林學士清河元公以至治二年壬

成二月七日薨于位葬而墓碑未刻其長子奉議大夫  
同知峽州路事晦又死次子嵩七歲一女病而不嫁一  
孫尚乳也夫人清河郡夫人李氏纍然抱其孫僦舩歸  
清河織紵以居賓客僚隸皆四散無一人顧之者獨其  
友玄教大宗師吳全節謂馬祖常曰清河公以文起家  
可謂貴顯光榮矣而其葬之後無碑以載其官閥世次  
行事之實爾宜為文我求善楷書者磨石以刻馬祖常  
曰嗟乎世之士一得志則攘袂於所親一不得志褫魄



若不能生者比比也今子託跡老氏而以禮義之事振  
吾徒何能多言以飾媿哉謹按公諱明善字復初資穎  
悟絕出讀書目所過即記諸經皆有師法尤深于春秋  
弱冠遊吳中奮一作念宋金季世之習已名能古文流傳

江淮間浙東路部使者薦之行省辟正安豐學再正建  
康路學居歲餘行樞密院辟充令史故辦章董公士選  
實僉院事敬之如賓不以曹屬御之也董公遷江西行  
省左丞復羅致之省中會贛賊劉貴反從左丞將兵討

之擒賊三百人議緩誅誤得全活者百三十人又將斬一賊命公臨斬左丞曰掾儒生能臨斬乎當震怖矣終刑已色不變將佐白宜多戮人及尸一切死者用張軍聲公固爭以為王者之師恭行天罰若等小賊跳梁殺其渠魁耳餘何辜焉賊貴盜書民丁十萬於籍有司喜欲發之公夜置火籍藁中焚之以滅跡贛吉遂安南行臺聞之亦辟為掾未幾進登仕佐郎樞密院照磨轉中書省左曹掾曹無留事坐誣免不辨僑寓淮南文學益

肆頃之坐誣事明復掾省曹至大戊申我仁宗皇帝養  
德東宮左右文化選天下髦俊之士列在宮臣公首被  
簡拔授承直郎太子文學仁宗即皇帝位遷翰林待制  
承直郎兼國史院編脩官與脩成廟實錄加奉議大夫  
是年陞翰林直學士朝列大夫知制誥同脩國史有詔  
命節書文譯其闕政要者以進公請與宋忠臣子集賢  
直學士文陞同譯潤潤一書成每奏讀一篇上必善之  
本無  
曰二帝三王之道非卿莫聞也太皇太后既受尊號朝

堂集議宜赦公曰數赦非善人福宥過可也乘傳出賑  
山東河南饑彭城下邳諸州連數十驛保馬民饑官無  
文書公專以鈔萬二千錠分給之民免死徙皇慶壬子  
脩武宗皇帝實錄明年遷翰林侍讀學士中奉大夫預  
議科舉服色延祐乙卯國家始策試士子選充考官廷  
對又充讀卷官迅筆詳定試卷數語辭義咸委曲精盡  
他人抒思者不及也改禮部尚書正孔氏宗法以五十  
四世孫思晦襲封衍聖公事上制可之叅議中書省事

毗贊良多知戊午貢舉復入翰林為侍讀學士通奉大  
夫歲終拜湖廣行省叅知政事便道過家上冢鄉之父  
老子弟迎謁勞問禮意周洽庚申英宗踐祚徵入為集  
賢侍讀學士召至上都議廣廟制授翰林學士資善大  
夫修仁廟實錄百官迎仁廟聖容云有卿雲見承詔為  
文以紀之賜酒嘉賞英宗親裸太室禮官進祝冊奏請  
署御名上命代書者三眷遇褒優近世無有也既薨之  
三月歸葬于清河王家原之先塋西三里泰定間得請

于朝贈資善大夫河南江北等處行中書省左丞追封  
清河郡公謚文敏魯祖諱興不仕魯祖妣楊氏二世以  
下皆以公貴祖諱海贈嘉議大夫秘書卿上輕車都尉  
追封清河郡侯謚貞惠祖妣高氏追封清河郡夫人考  
諱貢將仕佐郎同管勾蘆瀝鹽場贈中奉大夫吏部尚  
書護軍追封清河郡公謚孝靖妣弭氏追封清河郡夫  
人元氏蓋拓拔魏之苗裔南北轉徙不知所系家清河  
者至公四世矣享年五十有四其文有賦五詩凡一百

六十三銘贊傳記五十九序三十雜著十五碑誌一百  
三十出入秦漢之間本之于六經以涵泳其膏澤叅之  
于諸子百家以騁其辨刻而不見其迹新而必自己出  
蔚乎其華敷鑄乎其古聲倡古學于當世為一代之文  
宗者柳城姚燧暨公而已信乎其必傳也雖然才用而  
未盡積厚而施寡徵之于天其善後也無疑祖常襲從  
公游及公考士又辱第下列義當銘銘曰

於維公文並古立大沛厥辭世莫躡震龍瞽瞍力不克

蜚聲天衢名嶷嶷位臻公卿發軔跡蘊而不施用弗極  
神柅其馳學廼碩天藻挾縉珎圭璧五十四年反玄宅  
集賢直學士貢文靖公神道碑銘

天歷二年十月朔旦集賢直學士貢公歿于家越五年  
為元統甲戌其子師謙來官京師以公之行治泣請于  
朝天子贈公翰林直學士太中大夫輕車都尉追封廣  
陵郡侯謚曰文靖集賢臣顯又奉詔令臣考公族世里  
居官次蹟業之實賜師謙以刻于石以寵賚貢氏之家



以勸朝著師謹知臣于其父宿有好也迺錄翰林脩撰  
臣李黼編輯之狀授臣曰先臣之生其有所自立其流  
聲美于人其可以傳世而善後者孤不敢贊已維墓有  
碑實後嗣所以紀先人之德而飾其千百世子孫于無  
窮者今幸得以承聖天子明詔以請焉其足以稱碑辭  
而無慙者公幸張之臣叙曰公姓貢氏諱奎字仲章其  
先大名蒲城縣人七世祖祖文以武德大夫扈宋渡江  
繇鍾陵徙居宣城之南湖因家焉曾王父大用王父應

寔宋承節郎以公貴贈中順大夫禮部侍郎上騎都尉  
追封廣陵郡伯妣黃氏廣陵郡君父士濬累贈亞中大  
夫秘書太監輕車都尉追封廣陵郡侯甫冠以詞賦試  
漕司中程明年黜於儀曹即自訟曰學之時其道未足  
以為己志已在於為人亦可謂謬用其心矣謬用其心  
雖有志於為人其能乎哉乃力自學行詠歌息偃以忘  
其年視世俗之好無足累心者獨愛公甚於他子曰三  
郎和易端厚穎悟若過人者吾世有蘊德發必在是兒

也公年十歲輒能屬文已有聞於人及壯讀書并日夜  
忘寢食於經子史傳無所不治於其章義辭句類數名  
制委曲纖妙無不究詣於文章辨議閎放雋偉不狃卑  
近必以古為歸故出而名振江之南初被漵省檄為池  
州齊山書院山長於更謁選吏部時天下久平大臣常  
欲引海內儒學之士聚之館閣所以長養其才而待上  
之用公亦欲以功名自顯果於自立故不為非常苟難  
之節而清約才一作宏博之譽大夫士翕稱之大德六年

中書奏授公太常奉禮郎兼檢討上書言先王之制禮  
雖節文有經而本誠貴質惟不蔽於禮之文而得禮之  
意則可以對越而無慊不然煩為之節無益也朝廷多  
採其議九年遷翰林國史院編脩官至大元年轉應奉  
翰林文字階將仕郎預脩成廟實錄丁秘書府君艱比  
京師至家毀瘠枵然言不能聲太夫人見之曰爾嗣業  
於祖從事於朝少而學壯而仕父每曰是將大吾家隣  
曲曰是能華吾鄉宗人朋友之望亦猶是也爾父不幸

死喪不有中制耶脫有不諱非孝也始勉之粥食以自強  
畱延祐元年服闋起除承事郎江西等處儒學提舉  
明年就官見列械署庭胥旁午走繫數人立吏持牘詣  
公署曰是學校吏報事愆期者公斥之曰金穀勾稽狎  
狎木索職有司事耳吾以天子命提舉儒學教吾職也  
刑奚以為恚命釋繫以械屬縣官大書其坐之屏曰讀  
書之中日有具益飲水之外他無所求與諸生講說文  
義為師弟子揖讓周旋日匡坐堂上人見其色和其容

謹其言繹繹有理輒退而燕處聞其哦咏之音若程工  
督計者故士之屢恒滿戶外其及門者亦進不怠以止  
五年遷翰林待制預脩仁廟實錄書成特賜金帛有差  
至治元年謁告歸里第與兄仲堅甫奉太夫人以居斂  
氣下聲昆弟相顧白首怡然鄉人皆樂與從之游至於  
羈旅游客其歸之者無不厭其意公於接之雖勤未嘗  
見懈色於資之衣食給物雖頻未嘗有所吝惜太夫人  
病竟夕立床第前聞太夫人啜息之出輒倚氣喘戚若

以身代然者泰定元年太夫人卒三年復起公為翰林  
待制進承直郎四年秋七月拜集賢直學士奉訓大夫  
秩從三品天歷元年文宗即皇帝位冬十月上親祝香  
幣命公往祠北岳淮濟南鎮二年春還自會稽涉吳中  
以疾歸卧於家至十月朔謂其姪師文曰吾夢夜賦詩  
有云竹樹蕭蕭夾泉石又云九轉丹成生羽翼不祥奈  
何語竟溘然以歿公有智識度量人不見其崖涘凡再  
與鄉試文衡一為廷對讀卷官所取士多知名于時其

所第甲乙人咸服其平允其為天子代祠之使者再其  
攝大禮使侍天子裸太室者一皆肅恭靈神虔致上意  
為使而不疚於貨賄不煩於有司攝官而竣事無違禮  
是皆公行之微而世亦不能及也然公負有為之志不  
得盡見於事於勢利之會又不求機以投合取顯以其  
故終於館閣文藝之職而人之被其澤者蓋眇嗚呼此  
人之所以為公惜公之所以為公者如此而臣以此悼  
公者也公一時之與交者若清河元明善東平王士熙



四明袁楠巴西鄧文原長沙文矩悉當世豪傑聲名之士若臣者亦公之所厚故於公之碑得以盡臣之言焉而非私也公以歿之明年正月八日庚申葬宣城縣射亭鄉生田里之原享年六十有一母夫人李氏追封廣陵郡夫人配張氏封寧國郡夫人追贈廣陵郡太夫人子男二人師謙從仕郎集賢院照磨師泰由胄子試中程授從仕郎太和州判官辟署江淞省掾曹女一人適阮璽孫男三人高山奴吳山奴萊山奴孫女六人其所

著曰雲林小藁曰聽雪齋曰青山謾吟曰倦游集曰豫

章藁曰上元新錄曰南州紀行凡百有廿卷晚年粹擷

諸禮書為一家言未就而卒今師謙師泰皆孝弟純篤

緝學以世其家加之以磨礱灌養之功而不止其所至

方未艾也論次終始作為銘章豈特以榮貢氏以慰其

子孫以勸以侈以貽其鄉里哉將以昭聖天子褒優儒

臣之意以垂盛世之鴻懿也謹再拜稽首為銘以獻曰

貢氏來北肇自武德蓋其終威

一本作從自鍾陵又作  
盾其終歲未詳孰是

光被南國有善自身乃開承節繼述綿綿其承有奕秘  
書有子以文起仕奮跡太常旋書帝制有疑其容志馳  
萬里大騁瑰辭綜緯經史始來玉壺騰聲其價惟長左  
右惟同在亞在側惟僚相頌歎訝公夷坦坦弗矜愈下  
銓覈再試士曰予歸讀卷廷中帝曰予依淮濟吳越四  
周所覆公馬駢駢持幣奔走神欽公虔蕃祉以茂式父  
在序侍從之班告疾歸止幾佚于間竹木以居南湖之  
山公出公休鄉人顙顙廩餘者粟與黨及隣屋藏有書

遺其後人素領丹頤隤焉以怡言咲在耳乃哭于帷維  
公德善歿不見其窮維公所著傳不見其終有嘉二子  
且用未極其從維儉于厥躬永也其鴻刻銘墓宮豎江  
之東有萬子孫紹美于公

大元贈中奉大夫行中書省叅知政事張公神  
道碑銘

公諱昂霄字雲卿姓張氏其先世居定州五代時晉高  
祖割燕薊諸州賂契丹又徙真定民以實平營故今為

平州人金末擾亂世牒無所稽祖伯韜有文學不仕讀

書授徒為鄉人俎豆師生鑑鑑為海山縣丞有惠政娶

聞士程虞卿女有子三人長即公次冲霄仕平州酒稅

醋使以卒次平霄副鎮江丹陽酒醋稅務歿贈官從仕

郎保定路易州判官公力孝悌尚學術敦慎以睦宗族

子姓稱賴

頌一作

無有間言國初檄文臣詣都邑試士人

學中程者復其家公首以詞賦脩選至元七年辟署平

灤路轉運司知事十年階前資提舉北京平準行用庫

克勤厲守咸

一作職

較

一作秩

然有聲終更序績遷管勾濟

民鹽場顧子弟曰曲直有施而莫盡材予豈能偃仰中

哲匠繩度者而或予強也惠幼禮長葺力食生知天德

自貴於物而行苟不忤人道殆其盡於茲已奚必仕而

為榮為得祿哉于是居閒益講詩書六藝之學置諸生

左右撫掇前聞分釐辨對俾達所趣內熙外易慥慥肫

肫對客燕坐語及古今人物賢否事後成敗利鈍若水

斷縷續悉有左契每臨筆為文辭必緣情稽類不峭澁

艱遠而夷然有古作者風意歲時從容課僮僕治生業  
往來里閭十有餘載無忿氣無慢容殆依依乎厚德君  
子也以至元廿五年秋七月二十有四日考終於家享  
年七十其年十月某日葬平州西苑家庄之原子男九  
人長諱杲卒海山縣酒稅醋使次諱某早世次諱昱同  
監昌黎縣酒稅卒次名昇今奎章閣大學士資善大夫  
為時名臣次名昆承務郎陝西等處儒學提舉次諱曇  
少知好禮讀書日記數千百言弱冠為兵曹掾聞其師

滕司業卒中山謀請臨哭其喪例不許因棄掾得就哭  
還金教務自多學記覽以博其用而不幸亦卒次名晟  
承直郎真定路藁城縣尹次諱晟既冠而逝次曰旦承  
事郎遼陽行省照磨官女一人適士人劉源孫男凡十  
有三人曰璲監安豐路霍丘縣酒稅曰琳學而未仕曰  
山童夭曰璵將仕郎章佩監知事曰琦從事郎隆鎮衛  
千戶所知事曰琪甫冠卒曰仁童曰居安曰鯨川皆夭  
曰瓚國子生曰琥未冠卒曰珪曰琢幼而學曾孫男三



人曰紹安慙兒范陽玄孫男三人曰玄孫聞孫定孫皆

幼孫女五人長適同監馬城縣務趙簡先卒次又適簡次

適遷安趙璧次適大寧楊誠次名賽未笄卒曾孫女二

人曰高曰順玄孫女一人幼未名泰定二年以公子昇

時官階二品例推恩二代鑑皇贈嘉議大夫禮部尚書

上輕車都尉追封北平郡公妻程氏追封北平郡夫人

公皇贈中奉大夫河南江北行中書省叅知政事護軍

追封北平郡公初娶白氏卒繼室故元帥龍德讓女宜

家訓子成其內助而先公十九年卒追封北平郡夫人  
再娶夫人妹後公二十年卒國制諸夫人當封者格止  
一人昇以妻封讓後夫人龍氏得請亦追封北平郡夫  
人咸祔葬公塋禮也至順四年春集賢侍講學士昇以  
狀屬其門生馬祖常祖常雖不獲拜公而辱公子昇知  
最久跡其尹汝南焚禁書以全逮繫治越州忤權臣以  
逭民賦及數歷臺省則又有猷有為而公之流聲遺澤  
可攷而知矣嗚呼燕營間山川磅礴鬱積之交鍾而為

人者發舒凝蓄固有晦有明而豪傑瑰瑋之器世恒見之豈不以其稟之厚歟公生當草昧之初能知讀書業儒而躬不食其報殆所謂稟之厚而未顯者也不然胡寧公卒甫三十年而張氏之門躋膺仕紆章紱者充然滿廷耶是豈特因公之緒以知公又將驗夫燕營間靈明之所鍾也廼為之銘曰

有燕營陬有鬱平州藹其煇煇孰涵以收張氏德門實會其休王父伯韜肇茲善慶間闢以生乃起厥聞積厚

而微勃焉其奮實生縣丞揮于惠政世濟其美伊自公  
始既穀既官而屹其止曰熙曰勤以淑有子維德之徵  
爰受多祉後五十年燧具有炆于公于侯籩豆承祀紱  
冕車服馮奕委委昇也履之公實啟之有封馬鬣神安  
居之水哉沍沍迪爾後昆矢詩貞石式昭覃恩

石田文集卷十一

欽定四庫全書薈要卷一萬六千三百七

集部

石田文集卷十二

元 馬祖常 撰

碑誌

致仕禮部尚書邢公神道碑銘

泰定二年四月十四日致仕禮部尚書邢公卒六月朔  
葬于安陽度置之原越二年致和元年戊辰二月嗣子  
溫毀瘠纍然喪服持工部侍郎胡彛行狀告其友浚儀  
馬祖常曰先考衣衾棺槨飾終之禮庶幾無悔溫不孝

惟是墓道之碑無文以昭之敢以是託於子焉按狀公諱秉仁字守仁父姬姓邢氏世居安陽契丹女真擾中夏士族譜牒存者蓋寡故安陽邢氏始顯交口里大父諱植不仕有陰德贈亞中大夫彰德路總管輕車都尉追封河間郡侯大母李氏追封河間郡夫人父諱德裕有政事材志不得奮發卒小官贈嘉議大夫上輕車都尉追封河間郡侯母王氏追封河間郡夫人繼母郭氏封河間郡太夫人第四人曰秉義秉禮秉智秉信四人

皆後夫人郭氏出前夫人王氏獨生公一人兩世用是  
貴得加封光華甚榮公起家辟署河南廉訪司曹屬進  
御史府史又進丞相東曹掾滿考授承務郎平江路推  
官未上改承直郎濟南萊蕪等處鈇冶等提舉俄遷承  
德郎江西行中書省左右司都事陞朝列大夫為太醫  
院都事選充廣平彰德等處鈇冶都提舉官中議大夫  
外臺各以名薦尋為撫州路總管加亞中大夫廣平路  
總管凡十選以禮部尚書致仕階承務郎至嘉議大夫



凡六轉出入中外率稱官守初提舉濟南諸冶賦民不急逋逃復業都事江西行省婉畫直辭贊叶上下議遣官出廩米五十萬石賑貸屬州飢衆難之公請異日有擅發罪秉仁願獨坐萬齒斷斷斷斷疑誤待餉以活者不可

指數也都提舉廣平彰德等諸冶差戶程功曠火悉給縮賈殖貨以利於農治辦為最總管撫州專使臨門賜駟之官撫境地稅戶部賦木綿織布民病非所產即令輸直吏不得舞手取賄公私俱便之小旱禱輒雨歲連

大穰俗頗譁訐未幾民恥健訟移廣平路教學者以雅

樂祠事先聖孔子立鄉校七百各有弟子師課樹桑億

萬計絲續用饒民有婦妬妾妊而以妾妻奴者夫死而

族人欲有其家訟不決廼以子生月逆計母妻奴之時

得實其民遂有後闔郡號神明盜偽以小鈔貫文作大

鈔貫文如錢取鈔

一作賂

然註誤七十人止以首坐勸醫

講黃帝越人書躬視惠民藥餌比去官民鮮夭死者賦

有寸帛之羨立歸之主為政具有方畧要以惠恤元元

為本既致仕益礪志讀書強記不怠字書多楷法尤工  
古隸有子二人長子溫由中書檢校官拜監察御史吏  
部中書左司二郎中總管大名河間都轉運使丁公艱  
家居次子簡門蔭補承事郎監大名路商稅夫人蕭氏  
于氏祔葬並追封河間郡夫人享年七十有六嗚呼行  
聞于鄉政聞于時為子而上責其親為父而垂裕于後  
可謂完也矣為善人者可不以邢氏為徵耶是宜銘銘

曰

爾車薄薄爾馬蹻蹻勿驅我隧域時君子宅有繹爾蘇  
有樵爾芻母犯我松與萑時君子居若廣漢之明弗鈞  
距以傾若黃霸之惠弗飾異以詭時予有元之循吏孫  
子奕奕時昌時赫時善維吉時視予貞刻

僉燕南河北道肅政廉訪司事趙公神道碑銘  
相州安陽縣之趙氏有起郡掾為僉燕南河北道肅政  
廉訪司事以殁者諱思恭以吏治見於世其葬在安陽  
之吳村原葬之三十九年有子天經亦起憲府掾為監

察御史乃始請刑部郎中蘇天爵狀其行拜而乞銘于  
浚儀馬祖常其序曰趙氏世家安陽金有徙磁之滏陽  
者諱秉文仕至禮部尚書別為滏陽趙氏其留安陽者  
族世遠不能譜公曾祖諱德德生溫溫生仁仁起家同  
知鈞州公鈞州之子尚書之從孫也少讀書通其理亂  
得失之大旨尤愛治刑名書律欲以其所為思一有所  
奮成名蹟于世當是時天下甫定權貴人多出功戰為  
士者寡公獨於問學辨說法制數度上下委折之微有

足徵者年十九聲聞于鄉郡侯高鳴辟掾郡中稱其廉  
平久之貢中書刑部曹轉大司農掾其立志施事詳於  
利人而畧於便已以故一時名公卿咸禮譽焉至元十  
六年始官從事郎宣徽照磨管勾架閣未幾為主事尋  
陞經歷宣徽掌凡內饗外饗天子儲后侯王卿士食飲  
膳羞酒醴醕脩醢醬之共事素叢劇公在職十年所為  
問義理何如不毫髮顧計絲考粒潔以叅核出內姦弊  
無所逞臺臣上公之材擢拜燕南河北提刑按察司判

官階承德郎居官號為辦治入拜監察御史時山北歲

凶公請亟發粟賑貸廷議檄公就行至則施民所宜便

曲調繼之賴以活者至萬數人其所論於上多同列所

不敢言者其已嘗言則不綴以言曰無撓法害治足矣

然排幸貴黨佞為獨切所言有以儆世者歲二月八日

京師迎佛奉祠于城西流外諸司集與其役織染局使

儲普華倚時相受賕公糾以法時相怒召公政事堂詰

曰國家歲祠佛以徼善利若獨沮不虔邪公具事實從

容論其罪時相為歎息許之俾治如律先是宰相以戶曹金穀工曹興役簿書浸溢吏滋多不法請御史雜治之公分治工曹蓋累月而後理或曰君敢為而能敏今若此何滯緩也公笑曰是固人之所易能也而我則不能且是舉也朝廷豈以為他亦曰慎財用黜冗節浮而已今不深察其源委而苟簡以為之人雖以我能敏後有不勝其弊者已而果用文吏覆覈無錙銖舛衆始服公識慮之周密也除大司農司經歷轉奉政大夫嘗與



其長議務農重本十事入陳上前上獨顧公令即施行之廿八年詔改提刑按察為肅政廉訪司擢公僉河北河南道肅政廉訪司事頃之移燕南河北至元元貞之間四海久平繩吏法寬縱吏相習為沉浮幸終更去或按一吏則郡詆以剋暴職是事積不治而敝日以及民矣公僉事兩道約其民以聽古靈陳氏之訓按其吏獨嚴法無所假恕聽其訟必詰折得其情所為者使自服訟以故少人以故無所寃其巡察都邑必躬率博士弟

子負謁孔子庭升堂誦說導以禮治以故其所至不獨  
吏有所畏而民亦樂有勸焉其事親能得其歡其遇人  
和易質厚不為畦穽其處宗戚䟽近有恩於其先世田  
廬獨取其磽磈而完饒者推以與諸弟姪於拯人之窮  
汲汲若有不獲自奉衣服飲食尤儉以約既老讀書不  
去手尤喜陸宣公奏議真文忠公大學衍義曰是真臨  
官治民事君日益者故其發為論議措之事為多為世  
所稱其嘗所慕好若魯齋許公靜修劉公忠當世豪傑

拔特之士其嘗所薦引若保定郭貫張仲實滏陽安祐  
洛水劉賡者後尤有聞於時其字仲敬其壽五十有八  
其歿以元貞二年十一月望日在大名之官舍其葬以  
是年十二月八日其妣張氏其配焦氏焦金世大家代  
有聞人後公廿五年歿壽八十合葬公墓其子男三人  
侃早卒天綱由御史大夫掾為浙東廉訪司經歷拜江  
南行臺監察御史入拜監察御史清慎端慤為世名人  
天經補公蔭主獲嘉縣簿調興寧錄事卒女二人適主

簿王尉淞西廉訪僉事傅汝礪其孫男三人曰植天曰  
構為江淞行省掾史曰楷讀書未仕孫女一人適士子  
皆某嗚呼三代瞽宗米廩教養之制既壞人人不得成  
其材久矣漢以來時有赴功立事之會則材臣辨士技  
謀知諛之人比蹟同世若恒有餘時或至用無其會則  
往往瑰偉雄奇之人亦且無見於世蓋其窮阨委逸於  
草澤市里之中者豈少哉若公之材識器術及其德善  
如此且當赴功立事之會嘗有位于朝而不得極其志

以駿暴於世抑豈非其命也夫然公歿而有子為名御  
史嚮時用豈其碩大光顯又將在茲歟若公者亦可謂  
特見自立之士矣銘諸石使知公之不大顯以極其志  
也銘曰

時需厥人用或乖應適其會否能諧公躬智藝稱世材  
發聞秋官耀中臺驅磔虺蜮殪獍豺蟠信庾甦培厥栽  
謂極其志廼中推其生可嘉死足哀有懿孫子瑤與瑰  
殖是福祿公所開忠名孝績宜無涯噫乎公乎鬱余懷

山朝于躋下維隈刻碑高原貽後來

勅賜贈叅知政事胡魏公神道碑銘

皇帝御咸寧殿御史大夫臣某侍御史臣布哈奏言侍  
御史臣曩服勞官常夙夜殫忠力以稱所使蒙陛下器  
選為臺臣秩第二品得贈其父官中奉大夫職江制等  
處行中書省叅知政事勛護軍爵魏郡公蓋所以慰寵  
胡氏以昭其先人之善者既鴻奕已臣曩將叙緝其家  
之望郡系世及其父祖妣之休聞實澤刻書于碑圖久

不泯以侈陛下之賜以貢其鄉里以勸其後子孫於亡  
極彞惶懼未敢以聞惟陛下哀憐之制曰可乃敕臣祖  
常為製其辭臣昧死叙列以進曰胡氏遠出于舜周武  
王時有封於陳為舜後者曰胡公至春秋之世楚滅陳  
子孫轉徙因氏胡為肇姓其後仕於漢曰建曰廣者以  
勲名著歷魏迄唐代有聞人金之末鄆陵之胡氏徙相  
州之安陽縣公諱景先字彥明相州安陽人也少端默  
有遠操內自修飾不求當世之譽樂其所守謂竄

一作竊

作術求榮不多於竭力以供子職枉已逐物不賢於隱  
居以遂吾志故事親為學力田業生以終其世於富貴  
寵炎未嘗動于意兄歿侍寡嫂岳尤盡禮畜其孤某如  
已子里人有貸錢為本業子本相將至萬千數貧莫能  
償主責之棘戶自經公捐貲與償之里人謝為券質公  
所公火其券歲大祲出廩實以賑其鄉既匱又賣田繼  
之至熟人將酬之不受隣有喪子弱貧無所有公為具  
飯含衣被棺木以斂藏之恤其孥既長俾有家顧傭以



報不許盜有竊其牛羊者又竊所乘馬公知賊處一不

問人嘗具饌奉公公肉

一作食

而甘召庖人問之曰燔能

澤濡能焦味奚是適庖對以法上下釜皆新鑄合肉其

中密其款頂跡加火焉公曰得毋釜損乎味于適而器

于弊吾弗忍其平居恂恂恭謹遇人無戚䟽豁然無機

矜或欺罔之不以變春秋高矣出入閭里嘗却車馬不

御與故人父老游或具几杖亦不扶以故鄉人皆德其

善而嚮其莊不忍以字稱之尊之謂翁其長者語其子

弟必教以公為法曰為人若胡翁足矣其歿也惇寡饑  
饉難亟患阨之人相值必曰胡公之亡俾吾無所控恃  
政和元年二月六日方與親戚高會言笑如平時忽舉  
手謝客匡坐而歿得壽八十以其年五月十日葬安陽  
縣孝明村之原初封奉訓大夫載封朝請大夫同簽太  
常禮儀院事騎都尉安定郡伯進封翰林直學士亞中  
大夫輕車都尉安定郡侯累贈魏郡公夫人王氏亦鄆  
陵望族慈孝貞靜處親戚遠近長幼間盡其宜嚴饋祀

親紉縫澣濯至老而無懈容事夫能成其志教子能成其材彞官于朝閭里以為夫人榮而卒不見其喜彞官歸以貧匱不足於養為憂輒喜曰此吾所以教子也彞居魏公艱服起除拜陝西行臺治書御史辭就養夫人止之曰侍西臺臨四省四憲朝廷以為重地且秦中歲饑是辭豈義之急病讓彞曰而忘而父之訓耶後公三年六月六日卒祔公墓累贈魏郡夫人臣嘗銘其壙子二人曰彞由丞相掾起家為工部生事官十轉為中奉

大夫職十有二遷為侍御史曰規兵部曹女三人適鄭某王某李某皆士族孫二人敬伯侍儀舍人柏壽尚幼孫女二人適大司農侯公孫某樊某臣嘗聞彛為河南行省左右司員外郎時河南大饑使告發廩者如繹省臣以格未即許彛時代判省牘乃專發米三十二萬石所活五十餘萬人其為河西隴右僉憲隴右地極邊吏往往閹畧乾沒無所顧彛按擿繩姦賊墨坐者十有一人釋濫繫者八人沒贓四百五十萬緡其為右司都事

有以西域僧卜兆言釋重囚以解除者中貴人傳旨引富人子當死者至內廷將脫械爨白宰相置之獄其為御史為員外郎左司所言於上悉同案所不能且不敢言者臨事裁決引大體畧細故矯矯無所屈又聞其為尚書戶部也天子入正大統故典親王宗臣庶官衛士錫予之數為金幣穀幣以萬萬計時決月間舉故典者再執事者請括金民間以充用時廷臣多是其議爨獨以為不便乃稽諸內府之隱覈郡縣上供之實與內帑

歲積之羨不給則令鹽商入銀以准幣大朝會遂無閑事臣攝官御史中丞知經筵事實與彛同署又見其闡翼憲紀糾繩官吏入侍講幄考質經義究觀前世之變而至夫理亂興壞之際必委悉焉此彛之事臣得之于目覩者士論咸以誦彛而彛之語臣必曰魏公之教不敢忘嘻觀彛之事而質以其言蓋可以知公矣考諱璋踈達明信不肯為自欺以德行化其鄉曲隣有棗樹秋歲實積墜舍傍地命左右拾以歸其主與人交不矯

矯以異亦不翕翕以同以故人莫能親踈之居嘗自號  
曰陶然翁嘗語公謂胡氏之先世大業有緼德未發當  
後有食其報者至彞果顯用為賢臣妣祝氏脩身理家  
有懿則其智識德量過人遠甚畜馬有夜盲者僮擅面  
謾市人取直以媚夫人遽還其直且謝曰僮不以實言  
而輒汝紿吾不忍也以彞貴皇贈嘉議大夫吏部尚書  
上輕車都尉魏郡侯祝氏魏郡夫人嘻觀公考妣之事  
而徵以公之善尤足以知公世德之遠哉初吏部與其

晁弟起鄆陵提家北絕河來相晁弟皆還鄆陵而吏部  
獨考室於相焉其先嘗繼為宋金顯官而天興剽難之  
餘雖鄆陵葬有瑩瑩有碑石剝泐文不可識故其世莫  
得而詳然胡氏陳胡公之後於陳氏國分姓也昔漢陳  
太丘之仁鬱抑于當世而紀譔群貴顯者數世豈秦魏  
公之先既有榮名而子孫逢時不祥又有翳善晦德如  
太丘者乎不者何後世之碩大蕃興若是臣又知曩之  
孫子貴顯尚未艾也臣奉詔以國子博士臣沂原大敷



懿之狀考公子之所履以求公之世而得公之言行如此于是謹為之銘曰

周有胡公賓王纘聖陳墟姓別昉氏安定曰建曰廣漢  
樹顯聞亦有威奮蜚聲魏晉彌宋涉唐代奕其敬子孫  
世食占徙靡常既又益振一作抑載遷安陽維安陽里其

承有煒吏部之孫魏公之子讜儀侃侃稱天子使天子  
曰嗟曩侍御史王協于極邦肅于紀咨予爾嘉懋正厥  
事曩拜稽首臣昔筮仕左右致養以官就侍天子之仁

既多受祉臣罪不穀夫我怙恃帝閔臣孤賚之慶貤有  
爵有官秩躋第二生則孔榮歿顯亦熾維昔魏公殖善  
弗匱備樂孝養亦又多譽發祥在彞寶興佐時維皇好  
德是緝公熙肆厚厥有乃永其貽繩繩胤似勿替承之  
鄢陵之野既封既樹相城北西亦有新墓帝錫之碑昌  
此文壽百世其延庸勗爾曹

安定夫人王氏墓誌銘

夫人王氏故贈翰林直學士安定郡侯胡公諱某之夫

人陝西諸道御史行臺治書侍御史彛之母也世為浚  
都鄆陵人父諱貞伯始宅安陽兄諱穀由地官屬出主  
襄陽穀城二縣簿夫人在父母家時雖鍾愛于其親而  
食與衣常後於兄嫂及歸胡氏事安定公持婦道終其  
身無懈容親紡績組紉之工弗好世之侈靡華飾以儉  
以勤相安定公家政卒能有成慈睦仁祥族姻比之夫  
人有子二人長即治書次規業儒山東憲府辟署書吏  
補典寶監令史治書甫壯夫人謂安定公曰是兒資穎

悟可令早就學也遂求經師講先王禮樂詩書之義善  
屬文未冠令譽日著起家為大都路儒學錄大都四方  
髦俊輻輳於是治書學益碩大名益光顯矣省臺交薦  
于上歷監察御史右司都事左司員外郎工部侍郎丁  
安定公艱吉服浹月即拜今官使者及門致禮意敦請  
治書以侍夫人榮養為辭夫人曰兒來前吾有訓汝承  
吾志吾建事舅姑汝先考及我教汝胡氏之宗事其在  
汝乎今國家命汝為臺臣西南四省四憲府之評議屬

之汝其速行毋以我養為辭焉治書上事半月夫人訃至徒御不戒號泣東出及安陽喪次銜哀具書告其友馬祖常曰彛不孝先妣安定郡夫人以至順元年六月六日卒將以七月三日祔葬於先考安定郡侯之墓里人杜愚為之狀矣請吾友為埋銘以刺之嗚呼人之生有男女焉幸而為男子或有所樹立於世則不與百物俱盡幸而為男子矣無所樹立使人惡之惟恐其久生而何死之恤也夫人女子也為女而能賢為婦而能孝

為母而能慈從其夫子有官有封其所樹立殆過男子  
矣宜乎富貴壽考享厚生之福也歟祖常與治書同學  
古文使為銘義不讓廼銘而授諸來者銘曰

在相安陽有貞慈母啟封湯沐賦安定畝煒其輝光夫  
人象服柔嘉有儀百麗于福少也稚弱玉節閨房歸於  
夫家組紉含章教子俎豆不繫于遷弗雕其全而人咸  
天詩書禮樂六藝之師起其施施居其孜孜廼成治書  
懋官臺臣又成典寶克昌克寅克昌克寅亦既多淑善

後無疑譬彼種桂我稼則穫且痔錢鏹洹泉出山紆流  
相西鬱鬱柏松蒼蔚之濟允矣安定幽宮是域夫人祔  
之協其龜食孫子爰殖我銘不泐

故榮祿大夫大司農卿郝公墓誌銘

公諱某字景文霸州信安人也弱冠起家給事裕皇邸  
以才知名至元二十年擢揚州路治中二十二年遷同  
知淮西道宣慰司事又遷江淮等處財賦總管江淮使  
牘有令察司不按劾公受命陞辭懇請許察司按劾財

賦吏牘然後臣敢行詔獎喻而從之未幾丁太夫人艱  
扶柩歸葬斬衰哭泣居墓廬哀毀過常制近臣以聞成  
廟遣使賜品食憫勞焉縉紳大夫咸榮美之服除會兩  
淮鹽法壞吏因緣大賈相為奸田畝單弱操錢售不得  
食鹽盜翔貴州縣上狀詔公行戶部尚書乘傳往治既  
至督淮南轉運司漕輓廩鹽之在官者輸倉氏主之閱  
其書之次以為先後販者不得賄吏破其囊橐均利于  
衆大德八年正授工部尚書改戶部尚書至大元年拜



中書叅知政事二年遷尚書叅知政事階榮祿大夫公固辭不允乃就職歲餘以疾力辭杜門家居後中書省臣果有罪伏辜公愈以能退自喜獨雍容灌園種樹無資則持器物鬻之八年履跡不過中門游從之士已知其無志于一世矣屬延祐天子思用有經術之臣命中書即家起公為大司農卿間又病免上以侍醫視藥存問公雖病猶以國憂而其言語未嘗及其私也延祐七年三月十一日終于所居之正寢享年六十有二公祖

某贈資德大夫尚書右丞謚康靖考某贈榮祿大夫司

徒謚孝懿並追贈薊國公祖妣賈氏妣弭氏並追封薊

國夫人夫人李氏先公十年卒男子二人長曰升次曰

謙早世女子二人皆幼按郝氏出太原郝鄉所謂以鄉

為氏者也其世之或仕或學列于史官者尚矣然以才

謂選進而為股肱之臣者幾何人哉進而為股肱施替

一作克贊褒其謀畫者又幾何人哉則郝氏之世自公尤顯

矣公少俊偉慷慨能國語長博通古今經世之學發用

之應驗如占筮稽攷先王宗廟朝廷鍾鼎款識旁及百  
家之書而親愛族黨撫摩其孤者又純篤無偽嗚呼書  
傳所傳愷悌大雅之君子舍公其誰歟今亡矣悲夫其  
子升將以是月二十一日葬公於都城西山之麓之原  
祖常知公實深敢不哭而為銘曰

雲為雨星為石星石何由名不斁嗚呼善人保窀穸

石田文集卷十二

謹案卷九第九頁後四行喀爾庫庫舊作康里巉  
巉今改 十六頁後六行呼喇台舊作和里台  
今改 十七頁後四行雅勒呼舊作雅琥今改  
後倣此

卷十第三頁後四行瑪蘇庫舊作馬思忽今改  
後五行烏德美舊作兀都瞞今改 六頁後六  
行烏瑪喇舊作烏馬兒今改 十三頁後一行  
伊埒特穆爾舊作月魯鐵木兒今改後倣此

卷十一第一頁後八行鈕祜祿舊作粘合今改



總校官庶吉士臣張能照  
校對官中書臣潘奕雋

謄錄監生臣牟 錕

謄錄監生臣黃熙純

欽定四庫全書叢要

集部

石田文集卷十三至  
五

詳校官助教臣謝登雋



欽定四庫全書薈要卷一萬六千三百八


集部

石田文集卷十三

元 馬祖常 撰

碑誌

濟南安氏先塋碑銘

  
濟南安氏有諱圭字伯玉者明法律起家始試補行省

刑部令史尋遷安樂鹽司判官濟南府經歷官未幾又  
補行尚書省令史權刑省刑部員外郎仍正授員外郎  
進至濟南行省左司郎中是時君年甫踰六十矣即謝



職家居不起以至元甲子五月初七日終於正寢享年七十有一其子某以是月十三日葬君於某鄉某原先塋之東夫人成氏祔焉君先娶成氏再娶張氏成氏宣武將軍章丘簿昌之女先於君二十年卒有子四人長曰伸次曰僖曰侃曰侃女一人適濟南張鐸伸為登寧長鹽司管勾配成氏有子五人長曰惟湛次曰惟潛曰惟澄曰惟溥曰惟泌僖監泰安州酒醋稅配段氏有子二人長曰惟洪中議大夫江西湖東道廉訪副使次曰

惟洋倪為濟南府孔目官早卒無子侃朝列大夫知安

東州配李氏有子三人長曰惟演從仕郎冠州判官次

曰惟淑監濟州稅曰惟漢早卒曾孫一十二人長曰景

范惟湛子也承務郎彰德廣平臨水等處鐵冶副提舉

曰景元惟演子也進義副尉監杭州富陽稅曰景時早

卒曰景良曰景嘉惟溥子也後衛典吏曰景益惟洋子

也曰景璘惟洪子也曰景肅景周景魯景開景略皆有

學未官按安氏上世家棣郡改遷濟水南郡中君獨能

以吏文崛起致身高顯而其子孫迪蹈世美或仕或學

悉有名稱原

原一作豈

非郎中君生平有淑德懿行畱用世

資不赫赫發於其躬而彌致其來者踵踵也是宜植石  
鏡辭以昭示無極銘曰

惟鼎鍾以受也惟穀帛以售也德克肖之永有紹也

朝請大夫大明路治中致仕馮君先塋碑銘

君名仲德趙州柏鄉人系出漢馮君之裔高祖諱彬曾  
祖諱郁祖諱忠皆隱高祖妣李氏曾祖妣王氏祖妣緄

氏考諱安少有勇力能馳射不肯服穡事會國朝定中原兵南下遂起家為材士隸萬戶史侯戲下從戰兩河間屢有功時史侯節制諸鎮以便宜辟君為鴻章吉提控官階至宣武將軍辛卯我師濟大河進萬戶府行軍鎮撫都彈壓官凱還主臨城縣簿尋遷高邑縣丞丁酉加栢鄉縣尹凡為栢鄉縣尹者二十有九年而卒于官妣路氏迨中統四年君始襲父職栢鄉縣尹至元二年改涉縣尹六年真授勅黃進敦武校尉井陘縣尹九年

依前官真定縣尹十七年遷忠顯校尉同知晉州二十

一年改信都縣尹兼管諸軍鄂勒勸農事二十八年進

忠武校尉池州路判官大德元年改安慶路判官八年

進階奉訓大夫知益都路膠州事凡自栢鄉縣尹八遷

而至知膠州自敦武校尉四轉而至奉訓大夫至大四

年始以朝請大夫大明路治中致仕于朝夫人江氏再

娶夫人蘇氏又再娶夫人田氏子五人杞桂檜楷梓杞

江氏出餘皆蘇氏出也杞承門廕將仕佐郎主臨城縣

簿桂監安慶府河泊魚課檜監池州稅楷監太和縣稅  
梓湖廣行省宣使從子三人正栢鄉縣鄂勒次某官進  
武德將軍管軍千戶椿屯田百戶再從子一人良弼佩  
白金符衛卒府百戶嗚呼夫朝請君以門地少小即有  
官長益力有為豈不賢於人哉方之以進取為賢而不  
知用之極而將自蹶者遠矣今觀君之歷官歲月又且  
循序守道理不躁是能蕃衍碩大終致貴顯而無微咎  
也其於政績從可知也已其世德又從可知也已用宜

銘諸樂石以勸銘曰

振振馮氏唐顯漢世厥後或疑不載傳記有赫胄出皇  
元朝請章甫以居賁其閭井亦有秀才宋支蟬聯金節  
象笏式華以宣爰考德徵允迪之承疇之昀昀禾之芸  
芸栢鄉之原豐碑植焉刻此銘詩尚茲鑒旃

朝請大夫禮部郎中王君神道碑銘

朝請大夫禮部王君以泰定元年七月十有八日卒於  
北都留守之官舍有司給輦護柩扶還南都朝之卿士

咸嘆惋曰善人亡矣其弔賻之者異常禮焉君諱祖興  
字景先甫衛州胙城人高祖諱魏金真祐間及進士第  
官至寶豐令曾大父諱克溫金從仕郎輝州佐以節死  
大父諱文昱以父死國難誓不仕父諱樹後以君貴贈  
朝列大夫騎都尉追封太原郡伯母張氏追封太原郡  
君君甫官以文稱起家為汝寧府學正官諸生翕悅率  
教因新孔子廟而使之知所尊敬焉入補兵曹吏從實  
尚書往賑湖廣之饑實尚書用法須報下然後發廩君



曉之曰人三日不食即死也奈何欲傳吏牘以殺人乎  
獨不見汲長孺耶竇尚書是之乃大發廩料口給食全  
活甚衆再以吏遷樞密院及丞相府東曹掾故事兩府  
掾屬得遇儲貳入府就中書令樞密使位者加恩起一  
資君嘗持文書侍仁宗皇帝入西樞一署字考試誠一作試  
特授奉訓大夫中書禮部主事奉訓官第五品制應封  
一代君請于朝興祖五歲失父祖母丁夫人補紉紡織  
保哺煦育使興祖負笈就師而令粗有樹立者皆祖母

之慈焉蓋母孫相依為命者也願以妻封讓封祖母丁  
夫人于時丁夫人壽考在養詔以為汲縣太君搢紳榮  
之而當代之有讓封實自君始延祐七年遷奉議大夫  
宗正府員外郎准勅宗正府主北方刑獄凡罪無讞專  
論決之君言宗正司天子屬籍議獄非職也不聽會中  
書省檄命騎至湖廣江西兩省講畫歲賦便宜經總之  
者不使人煩此句上下疑有脫誤至治元年拜監察御史上疏請  
開經筵選胄子救荒節用等事出按諸道至河南省勅

行省參知政事伊實巴勒丹黨惡賊善毒流吏民臺臣以聞褫其官仍逮繫責對內外快之以中書吏部員外郎召還二年復以朝列大夫僉燕南河北道肅政廉訪司事論列十事卒以敦本尊化隆儒術為務且纂萃漢唐諫臣偉績名曰憲覽數百條並上之錄大名廣平囚禁民有榜筆成盜者凡五人獄詞具矣州吏挾書引囚伏庭下請曰某囚有罪律當某刑君徐曰囚實非盜使因果盜則口語與吏牘無異茲視吏牘皆牽合文深之

辭囚何知此即脫囚械而出之決日它州牒得真盜立  
致長吏于理滿二歲召為中書禮部郎中以職分曹從  
扈北上國制乘輿歲巡都其陪還侍儀衛文物聲名國  
容愈盛宗室諸貴必加宴豆鬼神祭祀必加數等故禮  
部分曹而北者尤叢沓難治君優游不急區別勿解名  
譽藉甚詔賜白金伍拾兩以褒賞之未幾遂卒于位得  
年五十有二夫人呼延氏子一人殺國子典藉始君出  
曲周輝州府君官衛地因留為胙城人旁古河渠水去



故道及淤成沙日漫沒人廬舍塚墓其嗣子毅承治命  
改卜新阡於衛之西南三十里小店之原君自仕多歷  
顯要視聲利為障蔽聰明之物中弗好之也然每悼士  
逐世化而亡其所學奮然欲有以激勵之不果也可謂  
有志者矣方予對策南宮時君再省曹手閱著令以試  
法已期其為令器而辱與游從同官京師交道益篤而  
比君死五日予以祀事出使悔不得執紼塋道而其孤  
毅泣涕襄京

襄京一作哀麻

拜而起曰先子之卒太常博士柳

貫已誌其壙矣惟是墓道之碑願有以揭之遂為銘曰  
維景先甫早用儒顯績學之勤乃應時選充充惠和祿  
于裳冕羈孤養親行以不忝端矢射侯飲讓而升寶羹  
大鉤陳諸廟庭才以備官政服孔宜問俗在途召節屢  
馳訐訐詒詒不亟不遲議禮考功有秩有儀從扈陪都  
卒為鬼徒反葬衛墟里人紼舁有膺者原沙泉在北刻  
諸樂石終古不泐

征行百戶劉君墓碣銘

趙郡蘇天爵述其外大父劉君行實乞銘於馬祖常曰  
先妣武功郡君昔安樂時念其父不忘懼其善不傳而  
名遂泯泯也嘗以語天爵迨先妣棄世外大父終不得  
銘天爵蒙慈母之教誨粗有樹立於時圖所以繼親之  
志者天爵其可不勉祖常曰孰無親乎孝於親之身者  
尚矣矧又能思廣其親之志乎乃為之序而銘之序曰  
劉君諱成字立甫貌魁岸奇偉讀書涉大義不事章句  
歲壬子國家初籍民屯田襄鄧間君與其兄俱在行中

服勤穡事每代兄作勞田官稱之久之從伐襄陽先登  
授百夫長常率數十騎畧武當宋邏兵四合屢突圍出  
皆不勝或欲降君殺馬為食居數日不降宋人疑其有  
誘各引去衆服其勇丞相巴延將大軍渡鄂州江命別  
將阿爾哈雅率萬戶張興祖軍分徇湖廣地君復與其  
兄從破羅飛文才喻周隆黃必達張虎諸軍薄靜江兄  
中瘴毒死君扶其柩而北葬既襄事輒屏跡田野課童  
種樹畜牧耕桑衣食以自給於湖南遇兵俘一儒生黎



姓用金購之曰此儒生不善力役歸我我將俾為弟子  
師果同歸教諸子於鄉餘所全活者衆此儒生其一也  
享年八十有四以延祐三年正月十有二日卒葬真定  
縣平樂原先考萬戶府君之兆考諱議起行伍元帥史  
天倪辟署權黑軍萬戶會副將武仙殺元帥叛即從元  
帥弟丞相天澤擊走仙轉戰兩河平金有功妣夫人孟  
氏夫人董氏前君二十六年卒子二人曰寓曰海孫二  
人曰允中曰弘中女一人故中憲大夫領北行中書省

左右司郎中蘓志道之夫人追封武功郡君今主

圭一作奎

章閣授經郎天爵之母也女孫四人一適奉訓大夫萬  
盈倉使李恕一適張林一適侯閭其一幼也世本歷城  
人金季山東河朔兵賊雜揉菹醢其民獨真定城完君  
之考因占籍焉而今為真定人者自其考始郎中蘓志  
道年少日君識其為令器以女歸之後其甥天爵又以  
文學進有官于朝孝而能成母之志俾其外氏之官閥  
世次刻於金石者竟賴其力焉銘也無愧銘曰

振振劉姓考室真定挺身兜鍪而官弗崇雖則弗崇勇也匪躬斬馬啖卒出金購士其謀則懿其惠則侈其迪其啓以多孫子女室命婦副笄封君出甥維彥日肆於文克表外氏纘茲勞功刻詩墓門維以亢宗

監黃池稅務王君墓碣銘

王君元父既沒之十一年其子國史院編脩官沂茹哀請於馬祖常曰子與予同登進士第又同官于朝先人生世以迄于卒其行誼無媿而生終齟齬以不合於時

者子能知之其宜揭以傳後者子宜為文沂之述諸狀  
者子宜加詳焉按王氏出姬姓周畢公高裔孫萬事晉  
更十世得列為諸侯滅於秦子孫徙雲中地今之弘州  
六世祖遼戶部侍郎山甫始著於家牒子三人曰元節  
密州觀察判官生調金左司員外郎以文學稱蓋世閥  
遠矣曾祖諱銳金尚書戶部員外郎祖諱國綱金監察  
御史使河中總帥完顏仲德戰敗死節考諱振間闕轉  
徙占籍真定力學砥行起家至江南浙西道提刑按察

司經歷配某氏有子三人長諱宗禮季諱宗議皆早世  
仲即君諱某幼自知問學侍經歷君居浚都為士子經  
師尤長於詩詞試浚都文學掾辟江東道宣慰司令史  
會使專恣他吏恐諛弗敢仰視君每以義言之屬歲潦  
飢群無賴起績溪盜斂相蔓民不輯寧宣慰司遣君覆  
視還請蠲徭役發廩以賙毗隸盜遂息進將仕郎宣城  
縣簿縣比歲供玉面狸四十畢罟不獲則轉購他邑糜  
貲毒民君至請悉罷貢姦民有詭飛田賦者歲取償里

胥吏循格不究君一正其籍乃建孔子廟築壇崇社春  
秋飭其牲器以與邑人行事川有梁田有溝道有寓館  
吏徒有畏而弗肆民知有政而趨功監司郡守爭為鼓  
譽江淞行省屬錄寧國太平二郡囚又屬覈考江陰錢  
穀他州縣訟累歲不決者多以屬君所至悉以一作能

聲江陰盜有枉為胥誅者吏黨按之既誣服已君反覆  
得其情為具獄白行省事上中書移刑部刑部允君議  
遭脅誅者得免死南陵縣僧以貲雄持縣短長堰溪水

溉私田霖潦水溢則漂沒崩蕩邑人訴於縣吏懼莫能  
施行君詣視毀之老幼至撫手拜慰且曰君出一鄉於  
魚鼈矣未幾擢拜江淞行中書省掾曹無留事適淞西  
廉問官與君素同里少持氣不相下頗嫉君君又不自  
詘以希合乃風旨豪梗羅織君以是坐誣免不辨起除  
瑞州平準庫使不就改仁和鹽場司丞又不就家居數  
歲又改平江行用庫使州縣趣曰君所與游盡一時知  
名大夫士咸燭君寃而君終不自訟就使終不赴孰與

君直乎忍是一往而毋憂君素守以流於物將推歷君之迹當不誣矣寧無為君採於有司也君不獲已就官久之自免歸階前資遷承事郎監黃池務稅以至治三年五月十三日終於家享年六十有七以某年月日葬于某州某里之原娶把氏隸州判官時之女男三人澄沂洙女一人適淞東廉訪使侍其同朝之子通孫男二遷善崇善孫女二人皆幼君甫冠即自立勤苦為文章履其身以莊儉亦未嘗過為崖機其官業行己之略一



皆自信不妄計進取少顧時人之所為而人亦以此稱之然亦以此嫉之至大間嘗為書言任人別邪正養民重守令法不可輕出期少施於朝廷而書不果上執政聞君名私使人致款欲官之錢監君知不足以共事卒謝去後果敗而君益畜其學以老不克用鉅公聞人累薦君才宜理劇文學宜館職皆不報屏居錢唐詩書尊俎詠譎息偃泊然亡豪髮世俗慮撫育諸孤子姪誠愛天至而急人之窮獎人之善汲汲焉猶負宿諾而抱隱

痛皆他人所難為而君為之不知為有德尤人之所難也其所著有政要書十二篇陶詩註三卷詩一卷嗚呼天興之變國土虜裂焚剽剪雖不百年而金之名家善士之子孫遺子不數戶矣初御史君以直節死人惜其未能大用於時夫固知經歷君之起王氏也經歷君位不配其德以歿於今凡幾年而承事君又斥不用君子悼曰不幸然孰知後世之將昌且久與今所以進士入官有古學方嚮于用而克濟其美於未艾豈其碩大光顯

又將在茲歟是宜為銘銘曰

冕弗媒也玉有珌也一擯不用有子哲也彪炳而文立其嶮也載善於銘行安轍也

故禮部尚書馬公神道碑銘

公諱曰和尼世本屬永古特部族居靜州之天山天山古居延海也曾祖諱特穆爾伊克祖諱博索瑪伊埒蘇海以財雄邊父諱錫喇濟蘇當金遷後都尚書省辟為譯字掾曹試開封判官改鳳翔兵馬判官死節贈鎮國上

將軍桓州刺史官名有馬因以立氏父死節時公年甫  
十七壯其父之忠義奮而投冠于地誓曰吾父死於國  
難吾紓家難可也遂侍太夫人王氏間關鋒鏑跋涉星  
夜出汗絕河而北見憲宗皇帝於和寧年少辭容端敬  
憲宗嘉賞之命贊布扎爾斷事官事國朝天造之始總  
裁庶政悉由斷事官燕故城為斷事官治所中原久罹  
兵燹民謳吟思見太平之日公力籌畫規度政脩事舉  
士悅民附胥為太和世祖皇帝以親王南伐公從行留

汴餽餼六師悉發糴音兄人賦一石取濟南鹽自堰頭舟

行陸輓數百萬斤散布軍所過州郡汴蔡河南之地農

在野而商在途不忍不驚而軍政修焉世祖皇帝即位

降詔褒獎其詞有曰有此勤瘁深可尚嘉云者阿勒達

爾據魚兒泊叛倉卒之際公罄家貲市馬五百匹進世

祖皇帝嘗給券賜其家曰後當償汝也版戶遂試學子

通一經即不同編民今令甲儒允丁者公始之也中統

建元既肇建諸部明年拜禮部尚書佩金虎符四年八

月二十一日薨于上都之邸第訃聞内外文武之属縉紳之士咸嗟悼盡傷形諸文字之間迄今傳而不泯也嗚呼公之薨年甫四十有八即以某年某月日葬于大都宛平縣清水河之陰之原太夫人王氏墓後梁郡夫人白氏祔後六十四年為至順元年曾孫祖常辱官禮部尚書請于朝追號推忠宣力翊運功臣勲事輕車都尉階正議大夫爵梁郡侯官僉樞密院事謚忠懿子十有一人長諱世忠常平倉都轉運使次諱世昌行尚書

省左右司郎中孫祖常官忝第二品推恩二代贈嘉議大夫吏部尚書上輕車都尉梁郡侯次諱世顯知通州事次世榮早卒無子次世靖不仕次世祿中山府織染提舉次世吉承公廕絳州判官次審溫嘉議大夫歷台州淮安瑞州路總管餘三人早卒不仕女四人三蚤卒一嫁廣東道副都元帥克呼濟蘇孫二十人長諱潤朝列大夫同知漳州路以子祖常備侍御史贈中奉大夫河南江北等處行中書省叅知政事護軍梁郡公次節

入王屋山為道士次禮下沙鹽司丞次淵不仕次開監  
在京倉次遺道皆蚤卒次遵通廸次保六賜提舉都成  
所次未名卒次約尼武備將軍蘭溪州達嚕噶齊次雅  
古處士以孝聞次必齊納奉訓大夫同知興國路事次珠  
實卜監富池茶場餘四人未仕曾孫三十一人長祖常  
由進士轉官侍御史次祖義郊祀法物庫使次祖烈汴  
梁等路管民總管府案牘官次天合監杭州鹽倉次祖  
孝管勾河埽鹽場次易朔南察院書吏次祖謙昭功萬



戶部總使府知事次祖元信州路教授次魯哈知行唐  
縣仕者九人餘者學而未官也玄孫若干人長武子中  
書省掾次文子國子生次獻子惠子並國子生餘皆幼  
諸女孫以多載於家傳茲不重出嗚呼我魯祖尚書德  
足以利人而位不稱德才足以經邦而壽不享年世非  
出於中國而學問文獻過於鄒魯之士時方遇于草昧  
而贊襄制度則幾於承平俾其子孫百年之間革其舊  
俗而衣冠之傳實肇於我曾祖也嗚呼祖常生三十三

歲父潤南官漳州教祖常曰吾祖有德未盡發吾官州  
郡不得施今汝頗樹立其大將在汝也後祖常佩父訓  
不亡忝官翰林直學士太子右贊善大夫禮部尚書叅  
議中書省事入臺進侍御史叨冒寵榮夙夜憂懼惟恐  
違父之教而墜我曾祖之業蒙不孝之罪死不瞑目於  
地下葬儀不具塋域不廣欲改而卜遷之宗盟曰封樹  
八十年矣神殆安茲未易改卜嗚呼祖常既撫我曾祖  
行實萬一而略論次之矣忍不泣而終銘之銘曰

有崛而起之孰趨而倚之將濟世美必承而履之懿矣我  
祖百年于茲衣冠之傳實維啓之世多王公亦多華靡  
惟不革俗而忽其圯繩繩孫子思馬有氏咸宜習禮以  
續廟祀

勅賜御史中丞趙公先德碑銘

皇帝御史

史一作奎

章閣詔大學士臣阿魯克曰御史中丞

臣世安事朕日久克庸祇畏相彼世傳諒有啓迪之者  
其令臣祖常為文以刻於碑臣祖常北面受詔廼屬辭

為碑之文以應詔曰皇帝將勸忠於天下俾人臣知善  
後之道茲千萬世慮匪私於臣世安也謹按中丞臣世  
安姓趙氏始居奉聖州之礮山四世祖柔當金季朔南  
淪胥為丘墟矣柔團結義民柵險以阨其兵衝使不得  
犯為便道以給薪水如平時鄉之人賴以全活者億萬  
計會天兵下紫荆口柔率義民歸行省巴扎且以單騎  
入各堡砦諭逆順各堡砦豪長皆持兵來歸我行省行  
省以恩制授龍虎衛上將軍真定涿易等路兵馬都元

帥佩金虎符兼總管銀冶再進總管諸處打捕鷹坊加  
金紫光祿大夫有子六人長守質佩金符僉山北遼東  
道提刑按察司事仍總管大都保定打捕鷹坊次守忠  
信翊校尉廣宗縣尹人戴之如父母焉次守仁早卒不  
仕次守純官百夫長次守政權打捕鷹坊次治一學老  
子法有道提點汴之朝元宮以方外故不仕守質二子  
長謙襲總管管打捕鷹坊次晟善治民作縣安喜鋤其  
武斷鄉曲者縣在畿甸上下稱之選為行監察御史再

遷監察御史山東道廉訪副使燕南道廉訪使次年改翰林直學士遇公卿輒指言時事利病不休也守信二子長貫早卒次簡今洛水縣尹貫子世安廼今中丞君守純三子長鴻和官百夫長次沁魯克提領打捕鷹坊次沙爾早卒守政二子長允昭信校尉保定路總管府判官次密總管大都等處打捕鷹坊維趙氏以國姓世系綿遠譜牒無考北士尚質復不肯以姓之顯者為所出故奉聖趙氏自元帥以下遷於布瓊山之陽已而又宅

於龍安今遂為易州涑水人涑水趙氏雖四世為郎官  
大夫然自中丞起家給事禁闥侍武宗皇帝冕服即蹈  
規矩言行有常事今上皇帝於潛邸勤勞夙夜夷險一  
心天歷之元皇帝入正大位徵拜叅議中書省事旋入  
中書叅知政事上讓位居東宮改詹事丞領典用監卿  
復入中書叅知政事領經筵事陞拜中書左丞入臺為  
御史中丞官資德大夫立侍正府以中丞兼侍正光顯  
榮遇在廷鮮倫而其折節下士盖有人所不能跂及者

令典官第二品得封二代異恩特封三代焉曾祖柔追  
封天水郡公謚莊靖曾祖妣南氏追封天水郡夫人祖  
守信贈資德大夫中書右丞上護軍追封天水郡公謚  
康惠祖妣李氏追封天水郡夫人父貫贈榮祿大夫大  
司徒柱國追封魏國公謚貞憲母劉氏追封魏國夫人  
臣嘗讀古書歷徵紀載年表列傳臣之事君多矣其際  
會者不一或以戰勲或以民庸或以文章或以勤勞或  
奮於功名以垂於簡牘夸者謂國以身致亦無有不奕



世載德爵位不大以蘊蓄庇蔭於後昆者也古則遠矣  
臣又幸得備從官聞世祖養德王藩時則有若姚樞趙  
璧仁廟則有若李孟斯亦雲從龍而風從虎矣其濬源  
豈無自哉要知必本於仁而其傳自遠矣傳曰活千人  
者有後元帥生逢末世手搏鬪諸盜以完黔首者衆矣  
奚啻千人哉則其後碩大昌熾遭遇聖明以成其名以  
顯其親者揆之于天道何疑焉中丞今一子曰享提點  
大府監內藏庫臣祖常辱列侍御史每從中丞在官日

中丞論議持平臧否於疾言遽色弗之有也詔既命臣  
為文臣敢舞蹈百拜而獻銘曰

有趙之裔壯遷于南涑水永宗元帥多勇赫赫元帥叱咤  
風庭柵木疊石保有萬丁鬪賊于原完我老倪自頂及踵  
膚無一疵豈惟無疵又無凍飢便其薪蒸食飲以時活人萬  
億歸我行省天子曰嘻于大肆眚凡厥逋逃悉來奠居申命  
元帥金紫懸魚有善有慶其美于膺分憲尹民咸樹官政  
廣宗之郊土瘠而磽膏以糞饒衆桑咸苞民樂趨事戴以

父母迄今有歌興於田畝安喜繼武實為弟昆鏢其頑  
獷使民不冤司徒魏公隱德于躬鍾美集厚全天而終  
發祥中丞事我皇帝兢兢翼翼夷險不二皇帝曰咨咨  
爾臣同我篤爾先維以勸忠移孝于忠培植基本爾臣  
銘之告于公衮

勅賜大司蘇國忠簡公神道碑銘

公世出朔北屬輝和爾部小字孟古德濟初公父多喇珠  
從高昌國王內附當我定宗憲宗之時以未用中夏之

字多喇珠始用其國記畫言語為札書習諸部人世皇  
在潛邸亦頗講於其學多喇珠既卒廼勅使者召公朔  
北公至上手公入便殿謂昭睿順聖皇后曰是兒幼貌  
偉絕肖其父宜出入屬侍間朕不忘多喇珠也久之以  
能世父業命以其書職教內諸御出宮人呼都克華妻之  
至元十年特命公提點資成庫階奉訓大夫主尚方幄  
殿伏宿屋令十五年詔改資成庫為尚用監拜公太監  
階中順大夫十九年遷太府太監二十五年又改尚用

曰中尚仍拜公太監進大中大夫未幾遷中尚卿階嘉議大夫尋命兼知太府監事階通議大夫成宗在位恩顧舊臣以公久勤事特授正奉大夫進秩二品時上省方陪都嘗清暑西華門見公第庫隘屏飾不稱遣近侍諭公曰朕固知爾能守貧然家苟不給當朕言毋諱公謝曰臣材亡可錄者被先朝恩冒有俸稍廩既以給衣食乘堅策肥若疇人子姪非不有所欲顧以無能不敢浮竊厚貲爾上聞益賢之武宗至大元年詔陞中尚監

為中尚院就拜公中尚院使三月拜大司徒進階榮祿  
大夫從一品秩公以位大固辭不許仁宗奉昭憲元聖  
太后入平難召公計宜隆福宮公從容傳曰

傳曰一作籌對多

援祖宗訓實及制事統御之變其語罕泄不傳皇慶元  
年仁宗即位復拜公中尚卿每給事直宮對上必懇陳  
治要與國政在顯位無益於民者指切言之上亦以公  
宿貴有德者多味公言勅中書賜以楮幣萬緡公又謝  
曰臣自以為置肝腦不足酬上德日兢兢不敢有墜言

汙履以孤累聖之眷故常有狗馬之心今病力不能任服事寧幸財於無功耶上固勉之終不受其年十一月二十六日以疾薨於昭回坊之賜第壽七十有六初葬順州第四鄉發信村之原元統元年四月公第五子監察御史塔納始買地於大興縣燕臺鄉艾村原作為塋垣樹列翁仲石儀舉公及夫人之柩葬焉於是臺臣以聞有詔贈公銀青榮祿大夫太保上柱國追封薊國公謚忠簡夫人呼圖克華贈薊國夫人仍命具公行壽

壽一作治

善勞世族官治

治一作階

樹文於碑刻之神道以假寵公之

孫子塔納以監察御史某之狀以請臣論次其言曰我

國家肇奮朔土車輿廬帳冠帶喪

喪一作喪

服以旦暮從事

於四方有攻伐之具有守禦之備輓牛輶馬必物其足

力耗革筋木束輳之器必權其功砮

功砮一作工砮

櫛比協材

必皆良而後用故國初即設官以典馬蓋一代之制不

比於衛尉太僕乘黃守宮令供億於祭享會朝幸畋而

已公以朔北聞族受知世祖自少以至於老曰資成曰



尚用曰中尚未嘗一歲去他官而尤悉力以勤其事不以久而不足狃也其知者此乎夫在位者數徙則不得久其官官非久則無以習而知其事故下無所馴以安其治其弊賢者不能以及於功不肖者罪不積於著而天下之不底於理其不由是歟臣觀公之久於其任任之之專而得世祖任官之意焉雖然在位者非其人而恃久以為治亦少有能治者也又觀公之善於其職與其廉取辭榮而得公之為人焉信公之言以質公之行

則其賢遠哉是不可使無銘也已公有子十人曰明埈

忠翊校尉監重慶路瀘州曰巴扎布哈亞中大夫監安

豐路致仕曰托和齊奉議大夫監南陽府裕州曰德諾

特武德將軍監汝寧府光州曰塔納奉直大夫監察御

史曰圖列布哈曰太平曰奇凌布哈未仕曰托克布哈曰

齊達勒布哈曰奇爾薩皆天女一人為監薊州名上都之

妻孫男十四人曰托郭中奉大夫湖南道宣慰使曰托克

托忠翊校尉同知宿州事曰呼圖克曰呼圖克布哈曰多喇

布哈曰布爾罕呼哩木曰萬僧努曰華善曰奇徹格曰雅克  
特穆爾曰德卜紳曰博索瑪曰班巴爾曰孟克特穆爾俱  
未仕曾孫七人班第承事郎昭蘓營繕司大使曰華善曰  
僧格曰桑森曰喀森曰觀音努曰富森俱幼嗚呼公既顯  
榮壽考以終其身距今甫二十四年而後嗣之蕃衍盛昌  
若此塔納又能脩敏質勤以名其官方嚮用未極非其  
力勞而報約之徵耶古所謂淑人君子者公於是可以  
當之矣臣攝官御史中丞塔納在察院故於其請奉詔

不敢辭迺再拜稽首為系之銘曰

位難而勤世不必久也公不以久而績益懋也寵賂而  
豐人窶斯受也公不以窶而廉自厚也夫惟其賢宜有  
壽也既碩既延公多後也燕臺比鄉墓焉公藏奚改于  
卜龜食惟祥曰貴與財孰碩靡懷貴驕財悖式貽身哀  
維公則否維志之求敢告脣續禔公之休

霸州長和斯喇實延遺愛碑

霸州達魯噶齊于閑和斯喇實延去官之明年州人列其

事狀將勒諸石太史氏按事狀而為論次之曰始州有惡子房黑厮籍屬縣益津諸田五百頃上於會福院者會福以禱祠為官不急民事即遣屬人按畝制民田前官悉不敢何問而君廼告於太府請于禮部竟歸其田於民十七戶武斷里閑冒占征戍軍士名籍不應役前有司莫之省也君詞得之咸各俯首不出一語以服事編伍州在甸服百里蒙枯之入官歲以鹺償之比官鹺至集民於州而口給之君均以法人皆便之州雜五方

之俗庠序之教不興君帥子弟以學而民知愧恥而遠  
罪凡若此者不一至於稅

稅一  
作捐

稍廩而食餓者禦田臘

以勸耕者梁津表道封植遂宜合社祀神雨暘時若是  
以知古之循吏之跡傳於載記者尤盡可信也夫古之  
循吏視今為無難者蓋嘗指以語諸人矣國家官制率  
以國人居班簿首州縣則又仍國初官各置建達嚕噶  
齊員並守令丞佐連位坐署閑然言語氣俗不相通大  
或恣睢壓僚吏小或齧螫

螫一  
作螫

單弱使者効治則稱謂

氏族貴重人人皆假貸不繩細微廉慎之節彼亦往往甘心焉而欲效古之循吏能專志於治者寡矣君能不牽於時俗而且有所振起可謂賢也矣如此則國之職纂錄者可不為之書以訓於當世焉

故顯妣梁郡夫人楊氏墓誌銘

故曾祖皇贈推忠宣力翊運功臣禮部尚書諱烏呼訥以中統四年薨薨之日有子十一人自第五子以上皆冠而婚餘六子幼稚曾祖妣梁郡夫人白氏又先卒諸

子以家素貴長者履跡未嘗一至田野幼者弱而母庶不能悉產業財畜之數豪奴婢因舞弄欺詐百物一空里第為奸臣阿哈瑪特橫奪家遂凌替祖皇贈吏部尚書諱世昌實禮部府君第二子生子三人長諱潤皇贈中奉大夫行中書省叅知政事甫十歲遭家難寄食

少長自知學問試吏大都路喜得廩稍逮養不恥也時吏部府君屬寢疾祖妣梁郡張夫人曰脫不諱則家無冢婦孰與治賓祭廼以禮迎夫人歸我先公叅政府君



馬夫人既歸吏部府君疾日益愈先公且置補荆湖宣  
慰司令史佐畫夔府之師名聲騰揚轉吉州路經歷滿  
歲丁吏部憂先公發廬陵遵陸北上夫人攜其嬰孩舟  
行至廣陵僦居以俟先公之後命先公留京師葬吏部  
而侍太夫人親黨就食廣陵者衆祖常兄弟方求哺未  
知事夫人始則賣粧具簪環衣袂不繼則晝夜紡績刺  
繡給養不匱服除先公調兩淮轉運鹽使司經歷再調  
監太平州當塗縣而夫人以至元二十四年六月三十

日卒享年三十二故中書后司郎中楊琰之女琰母馬氏與我曾祖尚書為女兄世實姻家有子三人長未名卒次祖常始九歲次祖義四歲一女五歲先公官未受代權寔於當塗之文昌宮東南六十步後四十七年為至順四年子祖常始克遷祔於光州平原鄉先公桐鄉阡之兆嗚呼祖常不孝罪戾無贖天降鞠凶夙集于身致吾慈母年不登壽而罹罪不淑祖常方在齟齬哭又不能盡哀迄今言之若利刃之刺心也追痛罔極殛身

而後已雖身歿而又何及耶祖常延祐泰定至順三請

于朝初封開封郡君進封開封郡夫人再進封梁郡夫

人孫十人長武子中書省掾次文子獻子並國子生餘

未名曾孫男一人古爾古曾孫女四人維顯

缺

妣夫人德

配先考孝事舅姑睦親姻而撫庶孽慈仁貞懿婦道純

全使世有職彤管脩女史者吾顯妣當昭章居篇首焉

憶夫人病將棘時祖常子然立床第前忽咳唾夫人已

不能言頷指祖常唾迹泣下而逝嗚呼祖常尚忍書之

耶尚忍而不書耶忍而書其又能文耶廼泣血為銘銘曰  
壁有時而燬土有時而為坎為壙嗚呼我妣天德純  
美宜受多祉而不期願使我孤子祿弗逮養哀於身  
歿而後已耶孤哀子資善大夫江南諸道行御史臺御  
史中丞馬祖常述

石田文集卷十三

欽定四庫全書薈要卷一萬六千三百九

集部

石田文集卷十四

元 馬祖常 撰

碑誌

勅賜太師秦王佐命元勲之碑

元有佐命元勲之臣曰太師秦王中書右丞相巴延弘  
父帝室有猷有烈輔理旬宣弼諧寅亮小心夙夜幾三  
十年人用揄誦延茲休聲蓋古所謂社稷之臣也上即  
位之明年制詔御史中丞馬祖常若曰臣巴延有勲德

于世宜文諸石以勸有位爾言不誣其令有司具其蚘  
我文宗中興之賢勞及其世閔行治序次之臣祖常受  
詔百拜退為文以進曰初文皇帝以武廟之子出居南  
服民臣咸思依歸焉王時以平章政事佩虎符節制江  
淮諸軍鎮汴故太師太平王右丞相臣雅克特穆爾建義  
迎文皇帝于邸使以告王王即檄下諸郡縣便宜發民  
丁給衛士聚芻糗金帛驛輸之用不足則貸商人貨約  
償倍息又許民折來歲賦充上供殺諸不用命者奪之

官日接盟介冑坐省中指竿釐劃節警近廣儲峙浚隍  
壘堞剝缺完治使堅夜臨按盡五鼓下不遑寐雖葦礫  
械鑰之微服饕餮享之具必曲殫其心力別募虢勇五  
十人往扈蹕于道始察里爾者有二于上屬乘傳來京  
師遣部人蒙古布哈伊埒台羅壘索克殺之尉氏館平章  
奇爾右丞伯奇特穆爾以私持時銳鈍疑沮王王手刺  
死之榜于衆以舉義事戒有司奉行毋忽民翕然引領  
幸上之來朝夕急而叅政圖卜台萬戶明安岱爾欲連



兵圖不利圖卜台手刃坐王下數數睨幾刃王王起拔

劍擊之走追斫其右臂殺之以徇取所佩符節整齊其

部兵得驛馬千二百騎下明安岱爾獄使聞上悅甚遣

薩里布哈拜王河南行省左丞相是年秋八月廿日大

駕臨御汴王

擐一作挽

强橐鋒率汴父老子弟導上至

汴邸自階下諸陪從官率卒吏賞予各有差百給物罔

有纖鉅畢取如寄而汴人且謳吟市不易殆不知載體

之大而勞也明日上解所被鎧御服寶刀及海東白鶻

文鵬為賜王趣勸上曰神器虛久請亟北轅以主宗社  
廼悉車徒嚴約令麾畢羅絡扈上渡河度道計日以息  
至則頓遞供張靡一不具士無敢譁以怠而民扶攜望  
拜歡呼如恐後越七日駕還宮以九月十三日正皇帝  
位詔天下改元天歷大業遂定加王銀青榮祿大夫河  
南行省左丞相尋拜太尉賜黃金二百五十兩白金一  
千兩楮幣二萬五千緡加開府儀同三司錄軍國重事  
御史大夫中政使明年正月拜太保加儲慶使尋又賜

白鶻文豹降虎符加忠翊侍衛親軍都指揮使時上以天下讓明皇帝居東宮拜太子詹事太保官階勲職悉仍故八月拜中書左丞相九月加儲政事三年正月拜知樞密院事至順元年特命王有大勲勞於天下凡飲宴賜以鄂克托之禮國語克濟業王定大難誅戮既多宜防不測賜集賽台百人摩哩齊百人阿斯罕百人俾朝夕宿衛王左右以備非常仍賜黃金兩龍符其文曰廣忠宣義正節振武佐運功臣繫以寶帶令世為明券又命

閼闔出王之孫女二年八月進封浚寧王加侍正府侍  
正十月加昭功萬戶都總使十二月加宣毅萬戶府萬  
戶忠翊侍衛親軍都指揮使佩故金符三年十月加徽  
政使元統元年六月缺今上踐祚以翼戴定策之勲

越二日拜大師中書右丞相上柱國監修國史兼奎章  
閣大學士領學士院太史院摠回紇漢人司天監事八  
月加領經筵事十一月改封秦王二年正月加威武衛  
親軍都指揮使太師總餘職佩符領軍如故王昔十有

五歲成宗命侍武宗于藩邸飭躬盡瘁不自暇逸勞任  
愼使必先諸御人仁宗王明宗于周命王為周王常侍  
四年拜江南行臺御史中丞五年拜御史大夫六年拜  
江淞行省平章政事三年拜河南行省平章政事在汴  
所至索政所宜施利害與民舉除之而宿奸碩豪異時  
常矯虔以毒民者徃徃褫魄去懼罪之將及已故四海  
之人靡不相為鼓頌而被惠之邦尤嗟其來之暮而以  
不久留為嘆且望也父曰

缺

武宗嘉愛焉大德五年從武宗北征與海都軍戰特濟庫  
哈喇台哈達地斬虜最諸將十年部將烏魯斯錫巴爾等  
遁王追擊之錫巴爾格鬪不下王數戰力至錫喇布拉克  
地錫巴爾降即不殺十一年武宗自和林入纘大統錫名  
曰巴圖爾拜吏部尚書巴圖爾國語雄武也至大元年  
改尚服使其年十一月拜御史中丞二年十一月拜尚  
書平章政事特賜龍虎符領右衛親軍都指揮使三年

正月加官特進延祐三年錦勒濟總宿衛興聖太后宮  
皇贈懷忠秉義毓德衍慶惠迪功臣太師開府儀同三  
司上柱國追封鄭王謚忠懿妣揚珠奇納鄭王夫人大  
父曰清噶故領軍百戶從憲宗平宋攻合州釣魚山戮  
力王事以歿皇贈守忠翊正効節宣力功臣太師開府  
儀同三司上柱國追封河南王謚莊順妣呼喇濟河南  
王夫人曾大父曰塔瑪噶爾給事宿衛皇贈服勤翊衛  
秉信基德功臣太傅銀青榮祿大夫上柱國追封陽翟

王謚敬簡妣呼圖克章陽翟王夫人元統二年上猶以  
恩禮為未稱也令有司更議進封曾大父曰服勤翊衛  
履信基德功臣太師開府儀同三司上柱國追封淮陽  
王謚忠靖妣淮陽王夫人大父曰推忠宣力同仁効節  
勤遠功臣追封淮王謚忠襄職階勛如故妣淮王夫人  
父曰推誠秉義協恭保德翊運功臣階勛爵謚悉如故  
咸有褒辭以示殊禮正室夫人克耒錦氏加封秦王夫  
人故丞相額森布哈女故太傅右丞相圖呼魯之女弟



兄四人長伊蘓岱爾平章政事留守次蘓尼台次雅克  
特穆爾中政使次嘉琿達尚服使皆世弟二人巴延台  
蚤卒次曼濟台今御史大夫子男二人長巴拉錫哩  
次沙克嘉錫哩咸備宿衛世摩爾奇特氏夫以王之忠  
清粹德輔翊累朝孝友於家嘉靖于國禮以自持義以  
立功董萬事之紀成熙洽之治為一代之臣宗而又有  
捍王定策之大勲著在我國家信史有載鼎銘是刊宜  
也矧又秉國鈞擢化澤佐我天子於未艾則夫爵有王土

極此光耀寵榮以燦休美於後世不其尤宜哉古稱有  
社稷臣者王之謂矣國家平康百有餘年君臣之際於  
斯為盛天子名碑首曰佐命元勲臣祖常文其敢辭謹  
齋沐而獻銘曰

赫矣文帝龍奮于南雲雷經綸家難用戡梁冀中夏  
八方之樞一有梟獍則祝我徒有寢秦王殿師于梁  
襲甲于裳斬其無良合兵在郭秣馬在廐以迓我元  
后則罔不奔走元后戾止耄倪郊迎弓矢鉞象箠鷙

弼大勞兵士牛酒金帛賈謨于區農嬉于陌疇舟河澍  
謹帝之來神工授能瞬茲濟而帝曰王賢汝久服事相  
與有家式殫勤瘁予聖考武皇惟王之嘉大毒收指氣  
無留遮外官蕃垣焱其鷹揚奉予一人征徒皇皇虎旗  
龍章日月之光帝車載安言留上國廟見告主配天建  
極廼肆大青乃旌有德王實左右以毗以翼皇帝曰嘻  
晝日三接鎧服寶刀金篆符節往總予揆施我民提擗  
者以恬呻者以悵孰降割于下鼎湖攀號時定大策王

實焦勞肆聖天子文皇帝是以乃圖王封繹彼世祀山川土田南國之渙曰佐命元勲惟王實有天子詔臣臣揭碑首臣辭不誣庶以永後作秦王考以續周卣

太師太平王定策元勲之碑

皇帝御興聖殿制詔中書省臣曰惟太師太平王中書右丞相臣雅克特穆爾以忠孝世臣戴予中興功在社稷其令臣祖常文於碑以昭於無極焉臣聞帝王受命天必儲瓌偉絕世之資將相之才與之會遇以成大業如

我太祖世祖英傑智謀之士聯裳充庭以為一世之用者豈非天哉天歷九年戊辰皇帝將正大位天人合應丞相臣雅克特穆爾以八月四日甲午率勇士十七人兵皆露刃建大義於禁中乃誓於衆曰武宗皇帝有聖子二人孝恭仁文天下大統當歸之今爾一二臣敢紊邦紀有不順者斬手梓平章額卜德呼勒巴延徹爾縛之分命勇士執諸疑貳者咸下獄待罪籍府庫錄印符空百司皆入內以聽命其日屬學士臣明勒棟幹等乘遽迎

皇帝于中興路密以意諭河南省臣而稱臣勸進者接踵於道左矣癸卯弟薩敷子騰吉斯皆棄其妻孥來皇帝以是月之甲辰發中興以丁巳至京師比至浹旬之間兩以左右矯稱使者南來者云駕已次近郊諸王及河南省臣萬戶各以兵從民勿譁驚北來者云皇帝大兄且至於是中外翕悅而衆志定矣九月庚申諸侯王王禪將北軍軍榆林西丞相出師彼未及陣趣薩敷馳入營壁衆潰追之懷來戊辰敵入千門鎮關薩敷赴之

戰薊東敗之十有三日壬申上即皇帝位于大明殿受  
百官朝甲戌進開府儀同三司上柱國錄軍國重事中  
書右丞相監修國史知樞密院事賜黃金五百兩白金  
二千五百兩中統楮幣一萬錠金織雜采二千疋白鶻  
一青鶻一文豹二承詔將大軍東出薊討圖們特穆爾  
平章即日就道乙亥宿三河夜二鼓偵者報王禪兵奪  
居庸關略大口丙子累糧趨榆河未戰聞大駕出宮親  
督將士亟請見上奏事曰凡軍事一以付臣願陛下班

師撫安黎庶上旋宮明日丁丑指揮使呼圖克布哈塔海  
特穆爾同知台哈布哈陰構變未發事覺械三人送闕下  
斬之己卯與王禪前軍戰榆河勦之追殘兵于紅橋北阿  
拉克特穆爾槍刺馬前盤馬斫之刀中左臂部曲華善  
斫呼都特穆爾亦中臂二人皆驍健將也會日晡就宿  
戰所庚辰上聞之遣使賜御衣一襲慰勞甚渥兩軍隔  
紅橋水為營辛巳合兵鏖戰白浮之野大敗之手刃七  
人夜二鼓盡呼裨將阿拉克特穆爾博囉齊伊勒吉使將



百騎風上大譟亂以鉦鼓箭射營中敵自蹂躪至旦始  
悟壬午天霧王禪等得棄甲北走癸未兵復集我軍列  
白浮行伍立如植木敵不敢犯至夜又命薩敦出其後  
南向巴圖爾托克托穆爾出其前北向鼓譟大呼吹銅角  
雜人馬聲彼營軍不知計又皆夜相射旦乃西走巴圖  
爾者華言猛士也甲申襲王禪兵于昌平北上遣賜上  
尊酒諭旨曰丞相每與敵戰親冒矢石脫不虞奈宗社  
何以大將旗鼓督戰可也丞相曰凡戰臣先之敵後者

臣論以軍法是日斬首數千級降者萬餘人乙酉去衣履徒跣求生者又萬餘人王禪遂單騎亡入北山發伊蘇岱爾額伯埒薩敦追之是日還至昌平南敵將準台庫庫攻破虎北口掠石槽民丙戌先令薩敦進以大兵會諸侯王兵轉戰四十里至牛頭山獲博囉特穆爾蒙古達實伊寶特穆爾薩爾吞四大將縛兩手載于馬鞍獻上天子斬之降者萬人餘兵四散夜遣薩敦托克托穆爾遮虎北口要其歸途丁亥諸侯王額森特穆爾及

圖們岱爾驅萬人薄我畿甸跳梁通州城下十月己丑朔日晡彼方憊馬我軍直擣之不及抽一矢東度潞水而逃庚寅谷面水陳兵不戰辛卯宵遁我軍渡潞水襲之癸巳再與諸侯王太平額森特穆爾都勒對及圖們岱爾塔海血戰擅子山棗林騰吉斯從殺太平於陣中餘夜遁甲午薩敦托克托穆爾將兵追捕乙未諸侯王呼喇岱指揮使阿剌帖木兒安圖自紫荆關口犯良鄉丙申我軍循北山而西士皆馬上食馬以糞盛草粟繫

馬口且行且食至盧溝呼喇岱兵潰凱還都人觀者拜  
者填道入見天子無矜容焉上大悅己亥進封達爾罕  
太平王以其地為食邑降制褒美功名烜耀刻黃金為  
印章以寵賚之珠對衣寶帶一具達爾罕華言世貸之  
也圖們岱爾復入虎北口戰檀州南殲之萬戶哈喇諾  
海以戲下兵降殺圖們岱爾函首京師誅呼喇岱阿剌  
特穆爾安圖都勒對塔海於國門之外齊王伊埒特穆  
爾元帥布哈特穆爾乃起兵嚮開平曰皇帝正大統於

大都矣汝等知乎姦臣道拉實囚首請死十月廿有二日庚戌奉皇帝璽來上大業遂定明年己巳上固讓位於大兄明宗皇帝命侍御史臣撒迪致讓奉迎三月戊辰丞相護皇帝璽於北土明宗皇帝嘉之拜太師官階如前迨明廟上賓皇帝游昇大位一歲之間為天子佐命兼揖讓征伐之事而使中外清謐華夏乂寧者茲非天儲其才使與受命之君會遇以成大業者歟文來奏上詔賜定策元勲名碑嗚呼盛哉臣祖常謹獻銘曰

皇帝應天赫矣龍奮風霆不驚受命啓運曰皇考武皇

御極惟昌靈在天惟祥神在廟惟享祐厥聖子弗畋

以克

克一作荒

弗燕于室海上浴日車還周遠陰隲我民

上帝監觀儲茲師臣維茲師臣出將入相戴我天子

征伐揖讓桓桓于于有亟有徐露刃袒呼虎旅疾趨

建義禁中群疑未同縛二三臣誓言於公君

君一作日

大統

之傳武皇帝有子天序秩秩孰敢干紀聖祖明訓封建  
伯叔分地車旗屏翰外服孽臣萌芽交構我家神怒而

憤民恫而嗟于徒于旅闕其如虎仗忠履順有弗義者  
斧地官金帛司馬介胄于時廷臣先事恐後大車出之  
軍容大施扼其重關使不得突馳羅絡森峙戰守攻具  
潢池弄兵悉衆來赴載同我馬東北之野斬鯢戮鯨血  
濺地赭褫衣跣徒日降萬夫號泣草間丐其完膚皇帝  
曰嘻丞相汝勞晝日三錫寶帶珠袍丞相稽首是皆帝  
祉驍將賈勇及我弟與子十月日吉來上玉璽姦臣感  
顛泥首就死奠茲海寓登世萬千矢辭貞石元勲之宣

元勛之宣開國江埭子孫保之維善慶弗愆

故貞節贈容國夫人繖巴喇氏碑銘

夫人繖巴喇故大斷事官伊囉幹斯之女孫故江淮等處行中書省平章政事阿爾彬之女故贈榮祿大夫大司徒上柱國容國公特穆爾布哈之妻今朝列大夫治書御史阿魯呼圖克之母也夫人生有淑德懿行未大顯著詔令臣祖常製其碑辭始夫人歸故樞密追封昇王圖圖爾哈家時王方躬荷干戈宣威萬里拓土開疆為國



虎臣貴盛光寵旌節焜耀夫人若常人女婦上堂執婦道親進盥櫛無失容也已而特穆爾布哈出領建康廬州饒州等處食封戶達噶噶齊夫人隨之江南知民間衣食生業愈自抑損貴習大德丙午特穆爾布哈卒夫人年甫廿有九也哭泣喪服葬具有法既有喪亦不事塗澤面髮殆如槁者以儉率下其家能完居廿有六年夫人將六十矣建康府上事行御史臺行中書省公牘交上中書下尚書准律可旌其門曰貞節又十年為至

順辛未夫人既卒子阿魯呼圖克請于朝追封容國夫人子四人曰圖魯曰華善曰額琳沁並不仕而歿一今治書侍御史也痛其母之早寡能以禮衛其身又教我使知讀書有所樹立於時銜哀具儀告其寮友馬祖常曰吾母真節方諸古烈婦無以尚也今幸有詔命汝為文以揭於碑祖常曰諾義宜為文矧我明天子有詔乎臣聞有道之世比屋可封蓋民化矣焉用所謂刑哉國家列聖治平重熙累洽其男子多公卿將相之才其女

子往往天資之以專靜貞順之德然不為世所知者衆  
矣夫人子賢乃得暴白之也謹按夫人于閨人祖伊囉  
幹斯充大斷事官者國初官制未遑立凡軍國機務悉  
決于斷事官斷事官行治在燕鸞輿尚駐和寧中原數  
十百州之命脉繫焉非今日隸于省院者也父阿爾彬  
以不附權臣而坐法故書夫人之行而并著其祖考之  
實所以表其積善之徵亦孝子慈孫之志也傳稱周南  
召南刑家以及國則婦人之相其夫子者多矣天子屬

臣載於文者詎非廣教化之意歟臣祖常乃奉詔百拜稽首而獻銘曰

有貞節淑女早嬪大家上堂問姑下堂事夫夫官江南實臨食封夫人喪髮哀戚靡容積年彌堅弗隨弗遷有司騰書表於里廛豈惟女師以義迪子秉憲內外震聳遠近始即泉丘夫人開國翟弗光華令善惟歸舅尊為王夫榮為公子為臺臣何憾於終漂水之陽大江北紆柏松亭亭有碑龜趺命勒銘詩天子所施今

曰宜之世之女師

石田文集卷十四

欽定四庫全書薈要卷一萬六千三百十

集部

石田文集卷十五

元 馬祖常 撰

行狀

贈亞中大夫順德路總管董君行狀

君諱元姓董氏趙州柏鄉縣進德里人也考世增世服  
農畝喜文字孝事父母鄉井以善稱妣夏氏生三子長  
曰貞次曰成君其季子也君剛毅體幹魁岸迨金室之  
亂兄貞等各逃難避徙君獨留養親不去雖蹂於兵戈

之衝而奉親之衣衾酒食必以時進或有暴于鄉者則率衆以禦之以是寇懼不敢相犯而鄉境帖然作業無虞迨聖元戡定華夏寵綏流亡民日漸離愁苦思土著而在所豪猾乘時劫奪單弱以自利君尤憫之族黨有逃亡而復歸者君即以完產而分給之微至井臼不潔毀也由是人益高其義其年調民赴雲州冶銀坑有司持民急甚君亦在行中又被檄督役其年故丞相淮安王使者入見上因命護工悉君執事恪謹及報政乃以

其衆別籍也可皇后位為綿戶仍署君為戶長益優之也居無幾棄之還里中家居課子孫讀書為儒生俾將有用於世也君平日務質樸不事靡習不與人角利常以理論人不使之有爭鬪獄訟割財以周人之急每語人曰吾始以孤童遭世運屯難出萬死之厄而長逢天下治康而諸稚頗慧若將有成人之望噫天其所以相我耶至元廿九年病卒于家享年七十有五葬于先塋之兆葬之日執紼泣送者二千餘人後以孫訥貴贈亞



中大夫順德路總管輕車都尉趙郡侯夫人夏氏追封  
趙郡夫人遂考於禮之意而合葬焉有男子四人長曰  
進以子訥貴贈嘉議大夫禮部尚書配文安趙氏封趙  
郡太夫人次和次福次祐女子六人長適郭讓次適薛  
寬次適番禺縣主簿孟瑛禮部有子二人長曰訥以儒  
起家辟為燕南道廉訪書吏嘗以大節自任轉拜監察  
御史對擊太師右丞相特們德爾在廷不敬震動一時  
由是數歷顯要政譽日隆今官登大中大夫吏部尚書

次早卒女四人長適耿氏次適孟氏次適尹鐸次適趙  
德和有子一人曰世傑提領順德等處雜戶女二人長  
適楊祥道次適霍祿福有子一人曰誼女三人長適郭  
明次適王隆次適猾端祐有子二人曰諒曰誠吏部子  
二人曰衍資風悟績文有緒已而不年曰維盤女二人  
皆幼按董氏世出遠古而至廣川漢江都仲舒名最顯  
廣川為今河間地於柏鄉圻壤犬牙郡侯豈其苗裔耶  
不然名德之盛又何以異於自斬艾者哉初郡侯純篤

力慕善道殊不知責報於天而必其子孫昌熾於後也  
但德鉅器大者福祿之所歸爾予每觀世之大人長者  
多不能偽茲豈非人所積歟若郡侯可謂求福不回者  
也予與吏部同官于朝而又同志于古也吏部屬狀其  
先世之行予奚辭焉願立言之君子重有以著於文俾  
孝子慈孫之志德昭其祖考之光美於罔極者是亦善  
善之道而春秋之教也謹狀

傳

息忙傳

淮北堧有州曰息先息國也居申蔡沈頓胡黃之間自古國有南北分則受勦焉以是地大壤曠蓬茅聿興大元視四海為堂陞力田之忙多就墾焉有忙媯姓於凡忙中最稱善播種事致殷厥家然大都世之靡麗奇瓌淫冶纖絕可酣可嗜者一切無所好俄為子求婦忙翁謀於其媼曰今茲東家女清婉靜淑姿美甚年且盛可當吾兒須召媒氏通慇懃頃之果召媒氏往問媒氏乃

過女父母家匿所過事陰覘女子病癭腫至不辯頸頤  
背如負箕腹下垂如蚪目黑白不分色漆墨卒自項及  
踵無一善相媒氏竟去報聘子婦者曰所問女不足當  
郎君萬一具言狀其翁媪反訾媒氏謂間諜兩好且稱  
女子有柔德能女工不論色也仍召他媒氏往他媒氏  
性駟僧善佞承戒過女家既見女父母詫陳國媯氏聖  
舜苗裔今家同姓之國淮西堞有畝粟千鍾地百頃資  
巨萬其子復丰姿容多才藝門下女妾熟知儻母能賄

我俾二姓合好則門下女專有其家父母如所請期受聘金日半相餽他媒氏還報曰女子玉色豐頰巧笑美目騰光古毛嫵西子不敢近又刺綉剪縷臙顰髦腊極天下之工味願亟聘無怠否則為王侯夫人翁媼喜不任比聘女先出束帛勞他媒氏乃別奉白玉二轂黃金千鎰純繡采稱是請日納聘凡翁媼內外族暨里閭所善聞之皆切笑相與圖告翁媼云他媒氏言浮于情先媒氏乃摘寶耳翁媼俱不聽命其子遂婚迎成禮女子

既歸夫家諗舅姑不我陋偵夫之覲我之不灼也讐族里之宿毀鬻我也大肆專妬日凌其夫凡夫黨之登其門者壺漿亦不饋焉惡聲彰著醜狀百出雖夫之女兄弟佩履聲過戶外亦恚恨不解居半歲舅姑怒於堂夫惡於室諸所與無不欲速其夫之出之也久之沉憂積無所寄托於天地之間屬淮濱大水因自溺死世之女子至今羞道焉太史公曰傳稱西子蒙不潔則人皆掩鼻而過之雖有惡人齋戒沐浴則可以祀上帝吾徵諸

古君子可信使此女幽閑貞懿以組紉為事不害其為  
賢也庶幾尚德之君子亦娶之矣何乃用媚道賄媒進  
於夫夫初不灼見厥醜久鮮不敗彼舅姑者擯良媒不  
聽信聲於他媒氏納陋婦終致貌行不可掩積怨交惡  
稔禍室家宜乎世之出婦也多矣

王氏傳

唐縣董堅妻王氏同縣人王瑄之女僉江南淞西道廉  
訪司事世安之女弟初王氏嫁堅時年十五堅父母在



王氏居于室執婦道非饋食堂上屨不過寢門委委諸  
娣姒間衣敝舊不補綴十百空不棄或蠶得紈素即問  
舅姑孰與舅姑不與人乃縫夫衣久之堅襲父職為均  
州翼管軍百戶戍兩淝王氏留侍舅姑所至元丙子堅  
將麾下兵從成交趾與黎蠻戰死瓊州海上王氏年甫  
二十七聞夫死喪哭三年堅父母不忍婦哀甚恐且死  
常慰唁之王氏悉脫簪珥不塗澤面髮脩婦女容日手  
緝麻枲作纊布間剪刻采繪象四時草木敷藹俾人持

入里巷區舍易有滋味物食事舅姑益恭舅姑死王氏

葬之棺衾服布不貫貸於人且有二子鞠保盡慈稍長

使從鄉先生學古義二子後果有樹立為文吏知名今

王氏年六十七矣縣令丞上其事丞相府丞相府下郡

國曰有令旌其門可延祐甲寅三月翰林侍讀學士清

河元公為表曰貞節王氏之門嗚呼真丈夫女也贊曰

劉向叙列女傳曹大家注不失義世傳此書又列之漢

藝文志女道於君子不翅十百倍何文學論著不已也

今唐縣王瑄女方諸古烈女何嘆其傳信無疑

節婦高氏傳

畿內屬縣永清為夥南直村違永清之治所積以里者  
若干土衍而民樸其男子率能力田慕義不敢弛教而  
近刑故永清一縣居畿甸五方雜俗之中獨稱為鄉多  
善士然在男子之勸學迪德固其所宜而何足尚也若  
夫婦人女子之行有能卓然不為時俗之所移巍然提  
身以節孝之美而無始終之異此雖縉紳君子猶或難

之况婦女乎哉况婦女乎哉高氏者永清南鄉漆里村  
高澤之女也笄而嫁同縣南直村里之王用嫁九年而  
用死有二嬰女哇哇以泣兩舅姑衣履日穿漏視高氏  
抱持二嬰心怵怵內悲我子已死婦有女子無丈夫子  
婦一旦必棄王氏去後高氏紡績給養兩舅姑益謹比  
及老高氏事之過其夫用初死時比其終高氏謀棺衾  
葬且一如大家身自表率二女習女工閨門之中出入  
有限今長適某次適某自是闔永清之人悉以高氏為

女師而尊敬之如此者四十年矣縣書其狀列上於大  
府請褒獎厥德藉用為勸府牒御史覆實禮部考制吏  
牘相徵無害於文然後命有司署表里門不役以事鳴  
呼俗之不善有司之過也茲永清之縣大夫知以善俗  
之意為政得請於上可謂有治民之術者矣故因高氏  
之行而并及其官焉

石田文集卷十五

附錄

桐鄉阡碑

虞集撰

故贈某官封馬公某以大德五年守光州有惠政後官  
閩中以皇慶二年卒囑家人曰光吾桐鄉也我死必葬  
諸其子祖常奉喪北歸至於光葬焉表之曰桐鄉阡云  
某與祖常嘗在太史故屬某識之按公家世歷官行事  
月日已具神道碑此獨著其係光者以示光之人焉初

金人侵宋江南宋踰淮設關塞列保障而金之窺光者  
自陳州出宛丘新息坦途千里無天險可恃故光之不  
得寧居者垂二百年每兵至郡豪輒率其衆走保金剛  
山須事定然後敢出是以國家既盡有宋地且七八年  
始知出降而光得以成州然畊者不足周其土來占田  
籍者皆四方之人也仁人君子固亦盡然重有感于斯  
已夫方是時公以有為之才撫新集之衆甫及三年而  
自信夫千古之託豈偶然哉惜乎舉措之微有不獲盡

知者矣獨聞在郡時有請歲稅光畝出粟十萬者公力持之卒不征光人掇茶山中以為次

一作資

運司行茶法

江南歲有吏索光人脅重賄山谷之民尤病公卒懲之使不敢復至乃立學官而躬教之謂司馬公實生是邦象而奉祠示之德行規以革其頑鄙若此者光人之所以思公而公亦以自信者與昔人之所謂桐鄉者良由是噫計公之去光而歸葬至于今久矣昔為公民者少者壯而壯者老矣父兄長者亦有以詔其昆弟子孫已



乎今天下日已治平光為內地取賦有恒制民生無與  
乎外事地力完而生物敏資用給足然道非賓旅所通  
出無車馬貨財之交無所耗乎華靡民之易治益愈於  
昔國家法令脩明擇吏謹審代公而治者其蹟可數也  
嚮乎茲阡豈直係光人之思哉理吾光者可以有所覽  
觀矣馬氏本西北貴族由兵馬死事號曰馬氏而光之  
有馬氏自公始祖常進士高第為代聞人諸弟若子相  
繼以文學入官來者未可量也故特著之以俟夫考世

徵德者是亦光人之志也

石田文集附錄

謹案卷十三第三頁前三行鴻章吉舊作合扎翼

今改 六頁後一行伊實巴勒丹舊作宜匝陌

丁今改 九頁前四行巴延舊作伯顏今改後

做此 前五行阿爾哈雅舊作阿里海牙今改

十四頁後五行和尼舊作忽乃今改 後六

行特穆爾伊克舊作帖木兒越訶 又博索瑪

伊埒蘇海舊作把造馬野禮屬該今並改 後

七行錫喇濟蘇舊作錫禮吉思今改後做此

十五頁前五行布扎爾舊作卜只兒今改 後

四行阿勒達爾舊作阿藍答兒今改 十六頁

後六行克呼濟蘇舊作濶里吉思今改 十七

頁前三行約尼舊作岳難今改 前四行必齊

納舊作必吉男今改 前五行珠寶卜舊作祝

饒今改 後一行魯哈舊作鹵合今改 十八

頁後六行阿容魯克舊作阿榮若今改 十九

頁前六行巴扎舊作八扎今改 二十頁前四

行鴻和舊作還濶 又沁魯克舊作還閭今並

改 前五行沙爾舊作山而今改 前八行布

瓊舊作卜珠顛今改 二十二頁後七行輝和爾

舊作衛兀 又孟固德濟舊作忙兀的斤 又

多喇珠舊作朶羅朮今並改後倣此 二十三

頁前五行呼都克華舊作忽都花今改後倣此

二十六頁前一行明瑋舊作明理今改後倣

此 前三行托和齊舊作禿忽赤 又德諾特

舊作德奴今並改 前五行圖列布哈舊作脫

列不花 又奇凌布哈舊作曲林不花 又托

克布哈舊作脫不花 又齊達勒布哈舊作赤

迪不花今並改 前六行奇爾薩舊作七山今

改 前七行托郭舊作脫禾 又呼圖克舊作

忽脫今並改 前八行呼圖克布哈舊作忽都

不花 又多喇布哈舊作朶里不花今並改

後一行布爾罕呼哩木舊作不兒罕忽里 又

華善舊作和尚 又奇徹格舊作給只哥今並

改後做此 後二行雅克特穆爾舊作燕帖木

兒 又德卜紳舊作德僧 又博索瑪舊作縛

往馬 又班巴爾舊作伴伴 又孟克特穆爾

舊作忙哥帖木兒今並改後做此 後三行班

第舊作班迪 又昭蘇舊作昭孝 又僧格舊

作興哥 又桑森舊作山僧 又喀森舊作海

僧今並改 後四行富森舊作福僧今改 二



十七頁前七行和斯喇實延舊作忽連刺沙今  
改後倣此 二十八頁後六行烏呼訥舊作月  
合乃今改 二十九頁前三行阿哈瑪特舊作  
阿合馬今改後倣此 三十頁後四行古爾古  
舊作狗狗今改

卷十四第二頁前四行察里爾舊作赤刺里今改  
前五行伊埒台舊作月魯台 又羅壘索克  
舊作羅里遂今並改 前六行奇爾舊作曲列

又伯奇特穆爾舊作別吉帖木兒今並改 前

八行圖卜台舊作脫別台 又明安岱爾舊作

明安答兒今並改後倣此 後四行薩里布哈

舊作撒里不花今改 三頁後五行鄂克托舊

作月脫 又克濟葉舊作喝蓋也今並改 後

六行集賽台舊作怯薛歹 又摩哩齊舊作減

里吉 又阿斯罕舊作阿速今並改 五頁前

三行特濟庫舊作鐵堅固 又哈喇台哈達舊

作哈刺塔花塔 又烏魯斯舊作幹羅思 又

錫巴爾舊作失班今並改 前四行錫喇布拉

克舊作失刺不刺今改 前六行巴圖爾舊作

把都兒今改後倣此 六頁前七行克耒錦舊

作怯烈真今改 前八行額森布哈舊作野仙

普化 又圖呼嚕舊作禿忽魯今並改 後一

行蘇尼台舊作雪你台今改 後二行嘉琿達

舊作教化酌 又巴延台舊作伯要台今並改

後三行曼濟台舊作馬扎兒台 又巴拉錫哩

舊作把刺釋理今並改 後四行沙克嘉錫哩

舊作沙加釋理 又摩爾奇特舊作滅兒吉斛

今並改 八頁後六行額卜德呼勒舊作烏伯

都刺又巴延徹爾舊作伯顏察兒今並改 九頁

後五行圖們特穆爾舊作禿滿帖木兒今改

十頁前二行台哈布哈舊作太不花今改 前

八行博囉齊伊勒吉舊作孛倫赤岳來吉今改

後四行巴圖爾舊作八都兒今改後倣此

十一頁前三行額伯埒舊作也不倫今改 前

四行準台舊作竹溫台今改 前五行蒙古達

實舊作蒙古答失 又伊實特穆爾舊作牙失

帖木兒 又薩爾舊作撒兒今並改 前六行

吞舊作討溫今改 後四行都勒對舊作朵羅

斛今改後倣此 後七行呼喇岱舊作忽刺斛

又安圖舊作安童今並改後倣此 十二頁前

二行達爾罕舊作答刺罕今改後倣此 前五

行哈喇諾海舊作哈刺那海今改 後一行道

拉實舊作倒刺沙今改 十四頁前二行緞巴

喇舊作薩法禮今改後倣此 前三行伊囉幹

斯舊作雅老瓦實今改後倣此 前四行阿爾

彬舊作阿里別今改後倣此 前六行阿嚕呼

圖克舊作阿魯忽禿今改後倣此 前八行圖圖


爾哈舊作土土哈今改 十五頁前二行額琳

沁舊作亦憐真今改

卷十五第二頁後七行特們德爾舊作鐵木帖兒

今改





總校官庶吉士臣張能照

校對官中書臣潘奕雋

謄錄監生臣黃熙純